

27874  
=3

三

茅鹿門先生文集卷之六

歸安茅坤順甫著

書

謝穎陽少宰書

僕謏劣無似所荷公道誼而骨肉之者二十餘年于茲曩者積兒之沒聞公泫然飲痛者久之其所為書吊且慰者一字堪一淚今緡兒獲以文章附弟子末席沒且臨風而悲悼之者如彼則其存且叨第而攜持之者何如也

與甥顧傲韋侍御書

甥昨臺中所建十二事宜疏鑿鑿中名實按利害  
聞蘇常以下並已畫一施行至於田地一則之條  
此殆吾湖中第一喫緊利弊處萬曆十年已按行  
矣近緣十餘勢人鉅室以吾甥左遷而遽爲變亂  
黑白以淆之撫按諸臺之間甚矣可爲太息也然  
聞撫按兩臺初猶中持專待郡縣之歸而爲參決  
數日來聞郡縣間爲勢人所劫外則猶爲好言以  
謝百姓而內則密以勢人所授者揭而覆之兩臺  
矣嗟乎嗟乎何吾湖民不幸之至此也請以數言  
折之經曰底慎財賦咸則三壤蓋言按其土之上

中下而量爲賦之輕重法也湖之絲綿衣天下故  
稱爲沃野而湖之絲綿從地出故利爲最盛且湖  
之患在水而湖之圩田十年之內所被水而災者  
六七而湖之地並高阜故其患獨無此外猶有一  
曰地田則以地而開成田其高阜故與地等而無  
水患者也二曰蕩田則原係地額而介乎沼沚之  
間淤泥歲壅此其高阜亦與地田等而無水患者  
也大略地之所出每畝上者桑葉二千觔歲所入  
五六金次者千觔最下者歲所入亦不下一二金  
故上地之直每畝十金而上中者七金最下者猶

三四金圩田上者歲所入米二石以上中者歲所入米一石五斗下者僅數斗被水之年則無粒矣卽如地田蕩田無論水與旱歲所入三石二石故其價亦與地相爲甲乙由此言之則地之賦例當從重而田之賦例當從輕三尺童子所不辯而知者只緣上產並爲勢人鉅室利其入豐而稅之約不恤厚貲買之此輩力能搖郡縣賄吏胥而下產則十年五七災者大略盡在小民旣貧且弱無以聲之當路耳甥之去年此疏蓋湖民所欲俎豆之者去年郡縣採公議而上之兩臺兩臺亦順下情而行之布政司只緣建議者甥也而湖之勢人鉅室所私啣而怨之者亦甥也甥偶落職諸所不便者紛然若蝟毛而起以反之矣蘇州田則甚龐雜而太守王儀出而一之嘉興亦然且德清亦一則而我歸烏獨窘抑至此聞執政已洞哲安得侷儻之士而共議之也

謝馮太史書

僕無似獲從公西湖之上稍及聞公所品畫世之文章大略世之所競者譬則女之冶容而鉛華也羅綺也與夫明璫而翠爵也而公之所指則在朝

書 卷之六 三六  
霞也芙蓉也與夫凌波而鳴珮也僕歸以語之見  
曹及帷中他弟子半解半不解然獨好之而數借  
公所指以程督其間顧兒曹以下或有志而未之  
逮焉頃者見之試南宮也適公在事遽獲引之門  
牆之末豈以其嚮所半及解者而輒收錄之邪嘗  
聞宋元祐慶曆間士之以文章而進於天子之庭  
者非楊劉不以與獨歐陽公出而天下之文章始  
知復趨於古蜀布衣蘇洵老矣一日攜其二子軾  
與轍以遊於京師歐陽公知貢舉既錄其二子而  
并及其父之文章之名遂以擅當時而傳後世然

則僕衰且耄矣罷官來已三十年于茲不及攜其  
子出遊矣而公之錄其子寵及其父得無老馬之  
伏櫪也且別爲噴珂跑地而悲鳴者乎杜甫有云  
每依北斗望京華僕於林壑所願隨明月而從公  
金馬承明之間相爲翱翔朝夕者殆什伯千萬也

與鍾文麓大尹書

傳曰上失其道民散也久矣僕附公綰帶之日淺  
知公不能深獨覽睹公舉子業非世所習勦麴粉  
黛而已者僕每嚮仲文謂公異日必以吏業名世  
已而公中鄉試後絕去故時戚里稱觴者之歡匿

蹤閉關攻苦食淡益發憤爲文章及第進士抱牒  
出爲令其所硜硜自好復如初甚矣公可謂卓然  
力古之道而不惑於流俗者僕好古之道而不能  
畢其志及聞公抗古之道而不同于俗安得不神  
馳臭附於公之左右乎及公之令惠安也聞頗與  
田野父老相爲吐哺僕固知公非今之吏而已也  
惠安之吏民不能遮留公閩之持節使者相與飛  
章上 天子又不能強請公今且不免更賢樂  
平夫民之情一也詩曰愷悌君子民之父母而曾  
子亦曰民之所好好之民之所惡惡之此之謂民

之父母要之惠安之民此情也樂平之民亦此情  
也公能好民之所好惡民之所惡而一切世之作  
好作惡不以雜乎其間則惠安之所席而行之者  
固當洒然而行之樂平之鄉也又豈有二乎哉予  
雖不知惠安與樂平據客所傳大較惠安之俗近  
於痼瘵而所先者在撫字樂平之俗近於獷悍而  
所先者在剗割然於剗割之中第能持父母之心  
以爲痒痲疾痛其間譬之瘍醫者察蠹肉闕血而  
砭劑之耳孟子亦云必如此然後可以爲民父母  
夫所謂必如此者一切黜陟刑殺並出於民之情

而已不與焉茲卽三王而上之政也又何有於今  
之吏治邪公行矣不能追公西行之車而共爲傾  
吐矣惟公以其所故施行於惠安者移之樂平移  
之上失道而久散之民而守之不變焉優柔以俟  
之公當尸祝茲土而異時甘棠之愛所與豫章江  
流川引而戶漑者百世矣茲固僕之私也不盡不  
盡

復胡敬堂大尹書

公之才練而深曩所發之爲公車業者以之掇一  
科第當如探丸耳顧數困之有司而僅隸之貢然  
卒亦以試吏部高等而縮

天子印綬出令英

山矣今

國家制以貢起家爲令者非南入桂林

象郡牂牁夔笮之間卽西界隴右羌中而北徙金  
城玉關以及盧龍玄菟而東者也故其朝而謁郡  
廷夕而乘亭障所擁者非氊裘卽油幕所食而飲  
者非羶葷卽蹲鴟僕嘗提兵百粵及經塞上縣大  
夫之抱牒而過者大較半雜慘黯之色少夷猶者  
也而公釋褐輒令中州其去故鄉特千里其所乘  
風土與服食也無相遠而公又以才之練且深者  
爲之端冕而南面其間數有客自中州來者僕數

詢公一切簿書聽斷之概客未嘗不稱善也抑有他使過陸合肥陸亦嚮使稱公嘖嘖不置也忽辱公所遺書又孳孳及僕之曩宦遊處所按行故事公得無於抱琴之暇爲陽春爲白雪而於以思我之同曲而聲相應者乎僕扣使者治狀大較與客所傳及陸合肥所口授無以異甚矣公之得志而聲施也語曰行百里者半九十詩曰永終令譽願公以僕所聞久之或四三年或五六年無改其初則不特世所羨重書之召行且尸祝而俎豆於其土矣不盡不盡

與張督府岢峽公書

頃戍兵鼓譟一節非敢稱亂也大略此輩自海上烽燧以來前軍門所從遑急中外旣困於島夷之力鬪內復厭夫調兵之兇悍故募金衢及處州一帶掘山竊礦之夫要之漢所稱羣盜者之遺也當是時專閩者方提枹鼓急矢石故不得不捐厚貲以招之而此輩抑遂稍稍習戰鬪赴湯火所嚮亦時時摧鋒斬馘以爲功甚且譚司馬戚將軍挾之而閩挾之而薊上之人所驕而參養之也非一日矣其中豐衣飽食載橐而歸什伍閭里轉相倣倣



父死子繼兄死弟及頻年以來東陽義烏諸州縣  
間棄累世廝山剝崖之業執戈爲兵什而五六矣  
無他習之所在其勢然也衆且謂大司馬胡公沒  
後海上烽燧不至所從諸將戍卒大較共爲輕裘  
緩帶以相躑躅而嬉耳可無事者然省兵可也省  
其兵之食不可也彼旣以其身藉之於官無復別  
爲父母妻子之養安得時羸時縮曩軍興時月糧  
外別給行糧間有摧鋒破陣卽冒不貲之犒故衆  
貪而競前近旣海上無事又從而於其所例給月  
糧之中去其什之二三甚而或給之又不以時又  
從而以子母錢陰奪之焉獵犬韝鷹肉食不飽能  
不號而颺去乎近年浙中多盜亦大率坐此旬日  
來或謂此中有飛揚跋扈之士不可不力除之否  
則必多他變或謂事體已緩耳目已靜稍從月糧  
中優以一二卽可無事愚竊謂二者皆過也 朝  
廷有兵制軍門有軍政唐末藩鎮之禍百年槍攘  
與五代相終始其初抑特起于戍卒耳嘉靖大同  
之變當事者以拊叛爲名支吾了事已而首亂者  
避罪入胡幸亂者乘瑕蹈釁迄於庚戌狂悖犯闕  
此其一也近復有南都黃侍郎之變二三年間勢

屬鼎沸非李克齋中丞由淮上入領司馬痛爲懲  
創則其事亦不能遽安此其二也愚故謂後一着  
妄也至於此中疑有飛揚跋扈之士又屬過慮漢  
袁盎不云乎彼吳安得豪傑而誘之吳得豪傑亦  
且輔王爲義不反矣彼並颺颺無他計者况公以  
中朝之望乘傳而出彼且落膽矣愚故謂前一着  
亦妄也據愚見彼其初特計出無聊譬之狂病跳  
躍已而痛定思痛自謂法在必死天威所嚮倘及  
宣言前當事者委屬處分未協則彼且感且怖畏  
罪不服公仍於將領中擇其稍能輯衆而不相猜

貳者令其自縛首亂其餘煽誘一切便宜覆以威  
德此特在公七筋關也第其中必有陽爲效順首  
鼠兩端而內實觀望傾危不測此其跡雖不可以  
名坐而其中則爲胎禍釀亂之甚請公遲久而得  
之亦遲久而後假他事以蒐治之蘇文忠公所謂  
齒脫而兒不知大較愚見如此此事毛瑣不煩盛  
慮特東南三十年來軍旅之騷驛兼之以饑饉之  
相仍其役於官者上下例托節省減削過多而其  
業於田野者戶口痍瘵餓殍相望妖星以後訛言  
數起幸我公以石畫舊臣暫填吳越非於一切無

名之征畫一條疏罷去則民漸不堪今日所急者  
恐不在二三跳梁之夫而在千里痍瘵之民引領  
而望公衽席之耳

與大司馬劉帶川書

言別來僕之形日以頽髯日以抽白求公曩所習  
睹故吾者眊焉已什之五矣而客從北來僕時時  
覘問公起居客往往謂公特躩躩嫖姚間擁騎歌  
吹而田獵乎長林曠埜之間晚則輦飛鳥狡兔以  
歸狼籍雜遯甚且無筭古者秦風駟鐵所載諸什  
是也公之氣亦雄矣僕聞之不覺神馳且願隨南  
風而從公蹠躩也偶過姑蘇逢張鹽使所攜健兒  
敢附書以候且欲公知僕雖衰猶能棹滄浪而行  
歌於五湖七十二峯之深與公載獫狝歌驕之概無  
相遠者一笑不盡不盡

與杜靜臺節推書

聞公以南宮不第遽爾謁選不知者以公繫海內  
之望久矣第不當令鷗鵬之翮而從鴝鷓於藩籬  
也其知者抑且以 聖天子在上賢公卿在下  
比年來繇乙科起家累官御史尚書郎及二千石  
而上甚且入列九卿或按節開鎮者數矣而僕之

愚則竊以公之學道三十年于茲信於昆弟支庶  
信於鄉黨朋友又且信於四方同志之士公今日  
雖不及掇一第與世俗所尚者相馳驟然公特按  
學問所自得處出之以臨民蒞官出之以御下獲  
上古人有言曰愷悌君子民之父母又曰上失其  
道民散久矣如得其情則哀矜而勿喜以此日夕  
孳孳焉鑿之於心砥礪之乎政事而因以念其本  
原得力處他不暇遠引周濂溪程明道楊龜山朱  
考亭輩其於仕路亦不及聲施當世然而州郡里  
社間於今猶尸祝而俎豆之者不忘也先輩所謂

得志澤加於民一命以上皆是矣豈必世之所競  
曳紫綬佩金印叱咤風霆乎哉茲固公所自信而  
自好當不待予之喋喋者然僕有尺寸之愚不敢  
不以獻孔子曰由也果求也藝賜也達於從政乎  
何有要之孔門所事者惟仁而至於從政則又獨  
挈果與藝達三字爲符固自有說也卽如孔子之  
爲司寇首誅少正卯墮三都卻萊夷一切作用固  
有翕張予奪其間而非世之儒生曲學所知者故  
曰仁術也幸公留意焉

與胡舉人論舉業書

舉子業一節淺視之似屬儒者末技苟於中極其深而研其幾古人所謂非六經之旨不以存於心而措於辭非吾所蘊之爲心而吐之爲辭粹然得聖人之至者則亦不能如百川之流行浩蕩而注之海予故曰聖學以洗心爲功而舉子業亦當以鍊心爲案吾輩能鍊其心如百鍊之金之在冶斯之謂自得而資深逢原也請兄試舉其心而反觀內照之得無猶有砂礪鉛汞相雜而錯出者乎諸子一桂輩頗知發憤爲文章前問師友之最者僕首以兄告之僕之私不特爲子姪輩求師友於兄以發指南之車抑亦併欲邀兄過草堂稍得以共兄早晚相爲折衷其至耳

與吳鳳麓大尹書

嚮嘗痛故司馬胡公於浙有百世不朽之功而卒爲忌者所構公議凜凜不於其提戈斬馘處當於其鄉發之已而不偶豈今天子明盛而日月之下猶有覆盆邪太息太息然所諭祠之學宮亦公之吏業一名案也萬惟明示以慰懸懸

與邵梅墩中丞書

曩年過壽先公獲從遊累日承公推先公之愛不

以鄙夷若將憐其世講之末深爲繾綣而骨肉之者公之德望矯然中外而海內人士共仰風猷僕瞻依雖切書問獨疎何者年入衰遲譬則繼樊之羽伏蟄之蟲無從竦翅張翼啓坏伸吻而飛且鳴於賢豪長者之側耳頃者公領節出鎮荆襄適地方災荒公所請蠲開賑招流亡卹困阨督諸州郡勞來其所全活者不知其幾十萬人大較與宋富鄭公之撫青州無以異鄭公抑自謂勝中書令二十四考而復有安慶一帶揭竿斬木之寇嘯聚流劫而南竄江黃以上公復提兵命將斬馘獻俘卒及底定公非詩人所稱江漢之功者乎僕切嚮往願爲公依依凱歌附頌金石而恨以道遠不知公帷幄間一切紆籌本末也如何如何

與費唐衢觀察書

公按節入閩而浙之將士吏民所提遺綬而奮報懷挾續而感恩者於今鰓鰓然如一日也而下走則尤深何者人生世間知己無幾獨憐公且移官入閩而下走之年日益衰以耄於園林泉石之佳猶支離杖屨千里命駕一段勝緣大都作隔世事矣惟我公宦轍再爲過浙倘下走未填溝壑或及

綰帶相從銜盃爲歡茲則僕之所無忘眉睫也門  
生施可大以郡司理之最聞嶺南今改建寧同知  
起家乙科故其浮湛若此嗟乎抑騏驥於塩車安  
能展千里之足乎惟我公首爲拂羈而飾驥焉令  
施于蚤爲著鞭茲則伯樂之所以空冀北之羣也  
不勝勤懇

與姚華麓憲使書

鄱陽詹君篠山世其父愛山所傳堪輿家學東望  
海上多異人且謂必有名山大川以孕毓其間以  
故抱青囊通謁門下倘辱賜之緩頰而譚掉塵而  
畫當必能爲公擇一牛眠馬嘶之地以報知己也

與趙麟陽中丞書

山陰趙生名紳者以繪事遊江海間僕衰且老獨  
於佳山水不能不時杖屨出遊或及嘯且詠而  
趙生抑嘗盤薄解衣輒爲圖寫雲煙泉石及其巖  
嶠嘔歎以歸而或有好事者載酒逆之共爲淋漓  
俯仰人或以僕輩恍然仙遊也每恨獨不及候謁  
門下故請僕書匍匐以見不識公肯賜之末席否  
古之一介寒士依世之王公以顯技術者何可攸  
舉倘借左盼信生之奇逢而亦公之好士之一班

也

與吳悟齋中丞書

頃覽邸報知兒曹從事西臺僅及再旬輒入薦草  
稍聞 中朝或爲獎譽然據愚見得無犯古所稱  
沾沾自喜者之戒乎僕之區區惟願此兒進以師  
事國之元老如公輩退且兄事疆立博聞者於以  
上下古今討論得失持之以深畜之以厚茲則父  
之所望於其子而遲之異日者傳曰羽毛未成不  
可以高蜚學問未成不可以強仕伏惟公朝夕而  
課督之二三年來臺諫諸君子及郎署間少年盛

氣者大較並以 天子及諸公卿開顏納諍往  
往撥拾浮言搖撼國家或傳中有行險陰賊者爲  
之鬼魅其間甚非所以持明盛之世也不知兒曹  
知領訓誨否僕以淪廢旣久於中外事不能諳習  
然念兒之深而憂兒之切不無寤寐惻惻然者惟  
公膝席而教之不盡

上穎翁相公書

肅廟以來言路甚廣茲固我 君相盛德事第一  
二年間其所懷忠持赤者固多而煩言亂聽者亦  
起科場一節口舌更橫然 主上每爲優容相



公輩特為解焚批劇而不以厭者宣德弘治年間  
 所不逮也東南州郡所被災傷僕年垂八十未之  
 睹抑未之聞者頃聞 聖天子破格寬卹第涸  
 轍之鮒望恩西江閭閻父老尚深杞人之憂邇來  
 臺諫交章公車大司農業已題覆第不知處分竟  
 何如耳語曰東南民力竭矣唯相公留神焉

復陳五嶽廷尉書

已丑秋得公子所從越州寄公所為僕序拙刻者  
 手而讀之不勝感激踴躍歌且舞之公之所言並  
 庖犧畫象以來文章之旨而僕少所自好抑妄謂

天地萬物之情各有其至而學者惟本之吾心以  
 求之六籍之深則固有釋氏所謂信手拈來頭頭  
 是道者古之名家崔蔡左陸而下其材非不鷲且  
 猛也然於古作者之旨疑或有間蓋謂由其心之  
 至而出而成聲則種種色色並所以摹畫天地之  
 化工而為文之在茲可也否則譬之貧者之持鉢  
 而乞市強者之行劫而剽路耳嘗共故唐太史荆  
 川公面為口畫合轍者什八已而荆川沒而世之  
 豪傑雋偉者並以僕所好奴隸之士苴之弁髦之  
 焉耳僕何以敢望公之厚為篤信而謬譽之者至

此然於僕則仲尼所謂竊有志焉而未之逮者於公則莊周所謂斲輪者之旨百世所不易者歲暮時聞公已過金陵僕輒欲移所梓公序文跨驢而走都亭或邀公於牛首燕磯之間稽顙稱謝而併以出其自好而未之能者面爲印證也顧年近八十荏苒巖壑不能出門戶留滯至今耳忽辱手問及他貽示諸什驚誦且服茲特先爲片楮以復秋八九月間涼飈刻露落木喧蛩決當摳衣膝席以罄平生也

復王進士書

執事世家學以文章名東吳州郡間僕雖衰且耄嚮往舊矣頃者使自兒曹宦邸歸忽辱執事手札併寄舉業刻三冊且屬僕爲批評於以梓而傳之僕手而覽之者累日大較執事於舉業已得其髓大者山立深者海潤玄者鬼瞰而中所自爲鈞奇鈞詭非惟經生者所不能言抑且有不能知之者僕何敢贊一辭於其間哉第叅而伍之執事所自好於僕所見猶有小異者僕嘗謂舉業一脉蓋繇王荆公厭唐宋來以辭賦取士故特倡此經義以攬天下材茂之士妄謂舉子業今文也然苟得其

至卽謂之古文亦可也世之爲古文者必當本之六籍以求其至而爲舉子業者亦當繇濂洛關閩以泝六籍而務得乎聖賢之精而不涉世見不落言詮本朝獨王守溪爲最上乘唐太史輩間亦從而羽翼之而執事且從諛僕集其大成過矣過矣僕豈敢當哉然僕之所管窺而蠡測不敢不爲知己者一傾吐之舉業一脈卽說經也歷代聖賢所自見處小大深淺不同傳不云乎太山之於丘垤也河海之於行潦也類也而學者卽其言而疏之爲文亦當按其小大淺深之旨而各爲支流而分

析之卽如學庸語孟所載孔子與顏曾已屬不同而顏曾以下較之游夏輩又不啻什伯其間叙事紀事問辯質疑星羅雲遯而世之競爲勦襲者甚且影響而蕪穢之不特楚人之爲孫叔敖者衣冠而已往往田傭牧豎而富商大賈之飾甚矣其可笑也僕竊恥之然亦不免間知其非而或蹈之何者入魯而不得不爲章甫也入宋而不得不爲縫掖也此亦婦人女子之對鏡自照而復自嘲者執事之文雄矣據愚見所及抑不能不疑其或過譬之兵家執事所當與項籍鉅鹿之戰旗鼓相當

矣而以按之孫吳或屬一間也譬之談釋氏者執事所當達磨西來獨鬯禪宗矣然於釋迦所首雪山苦行及面迦葉處又不知一一合乎否也故僕讀執事之文多心掉目炫而於什一之間猶不能不少有齟齬離合故敢先爲書以請而不敢於執事所刻草草鐫次伏惟執事垂亮焉

與趙定宇侍郎書

僕無似罪錮且久而公獨推先大夫之愛數爲挂之眉睫口吻間何其勤也頃者天子且召公爲少宗伯不勝蚤然喜躍然歌且舞僕嘗妄謂士

大夫名業惟不同俗者斯能不干澤不媚世者斯能不擅權無他玄豹而濯之以南山之霧也而後其文章炳以蔚應龍而蟄之以九淵之海也而後其膏澤霈以沱然則二十年來公所繇文章侍從日月之際且進且退而獨矯然中持不詭隨不浮湛今之學士大夫所共爲望斗垣而瞻泰階者豈偶然哉主上春秋鼎盛數以疾不視朝儲位尚虛四圍多故傳不云乎政且及子恐亦門下吐握焦勞之秋已引領引領不盡不盡

與周山泉督府書

公東山之臥久矣

聖天子採臣下言還之

朝請僕不勝爲 國家忤且舞然而衰老之年巖壑之蹤無繇附青鳥白鴈銜書問候而公之博大忠貞之誼蕭疎澹泊之襟未嘗不漑於心而挂於眉睫也頃者縉兒以僕患瘍不勝縈歛於是上書乞疾來歸道出撫治辱公憐之又從而移書僕不肖併及分俸以投之公得無故人綰帶之思而不能忘者乎公之譽望冠中外 聖天子行且召而席之樞筦置之左右叅大政鎮中朝旦與暮也而僕頽然衰白所謂去日長來日短如欲再爲滕

席披風素掉塵摧今古恐須屬之再生也已寤言及此能無感舊而懷悲已乎茲顓使函書以謝外機杼聊以備公之授衣而家刻史漢鈔併詩文稿一編則以僕之鉛槧筆研間附上求教而抑且欲公知我之衰猶不致頽墮者如此不能盡所欲言

謝陳五獄序文刻書

僕少不自量頗好習爲文章詩歌之什願附世之騷裏而蹠躐千里鷗鵬而翻飛層霄也顧以蹄之窘而翮之鍛寘之泥淖困之藩籬久矣辱公所序拙藁爲褒稱而詮次之且謂或升古作者之堂何

敢當何敢當伏思 國朝以來詩聲起自高徐輩  
凌轅宋元已而何李中興而邊太常顧中丞鄭繼  
之薛君采朱子升馬仲房輩繼之嘉靖間張子言  
高子業王履吉黃勉之唐應德陳約之許子春蔡  
子木皇甫兄弟輩又從而羽翼之已而李于鱗輩  
翱翔郎署互相標榜甚且叱咤風霆而噴嘯日月  
也五七言古詩及近體以下不敢謂金中律呂然  
大較翩翩乎上附六朝下薄大曆矣獨於文章未  
敢輕議宋太史後寥寥也王新建論學書及兵略  
諸疏可謂千年絕調矣而江西以後猥視末藝節

如唐王以下頗厭何李之抗聲藻而略神理也稍  
稍於歐陽曾王若將共爲翱翔嫋娜其間然抑或  
疲矣他操觚者輒呼曰某太史公也某班掾也世  
之借耳傭目者一時不察共爲道聽塗說而附和  
之然要之去古遠矣何則孔氏讀易猶三絕韋編  
也達磨西來猶面壁者十八年而後折蘆東渡首  
傳宗旨也文不本之六籍以求聖人之道而顧沾  
沾焉淺心浮氣競爲拮据其間譬之剪綵而花其  
所炫燿熠燿者若或目眩而心掉而要之於古作  
者之旨或背而馳矣僕故妄謂 明興以來二百

年行且有韓歐者出風行海流大闡斯文也公得無爲之歛歔憤咽其間於以奮袂而橫戈者乎若僕則衰颯矣公所云云蓋不能不愧於心而鑱於衣帶者謹具書以謝外刻漢書鈔一百卷班孟堅所共太史旗鼓相當或得或失處抑稍爲鐫評其間其所橫加刪削者特人物表而下及元后王莽諸傳大都雜之以曹大家輩所附者耳倘及塵覽幸爲批示秋深以後木落霜飛終擬跨一驢走候公於牛首燕磯之間縮帶膝席而聽公所折衷者不知其肯許否

與蔡南麓方伯書

僕罷官來垂四十年於世之縉紳學士不相及然獨間聞公之道術德望傳所稱朝之著蔡國之典刑是也慨於心者久矣豈謂晚歲未填溝壑猶及公復按節浙上稍獲望顏色瞻簪舄及聆高論雖雖乎道誼之深古人所謂招之不來麾之不去內之領衷百執事外之綱紀四方者非公之事已乎而先師來菲泉先生之孫曰拱日者過草堂數稱公過蕭山時時諮訪其子若孫及遺書所世授處併投之以金已而再扣之先師令奉新時公甫

七齡然公以里巷長老所口其吏業故過其故里  
詡詡齒頰若此仲尼不云乎故舊不遺則民不偷  
公之於故令猶無忘如此則公之仁心篤行可知  
公之於其故里猶且煦煦然如此則其遺骸所埋  
與其子若孫所零丁孤苦而爲之拊循提攜也又  
可知顧其家索矣猶幸拱日者稍稍可以文章潤  
其身而繼其詩書之澤者也四應省試未及撥一  
第以公無忘先世茲且抱生平所著文若干什願  
出公門下不知公覽睹之他日或可列公宮牆桃  
李否僕少受先師恩最深其所被督教而以國士  
許之者最亟故今於公所當引盼處不敢不上書  
陳謝而亦不敢不爲其孫請謁也伏惟留神焉

與石東泉司徒書

縉兒以僕衰且耄及聞去歲所抱瘍毒上書乞疾  
南還稍及聞公所席君相之知與中外之望當與  
前代名公碩卿相鴈次也不勝欣慰然而竊思今  
日時事之亟惟大司農與本兵而已或曰馬市以  
來邊備旣弛在邊臣則倚以爲長城而罷烽燧息  
刁斗且陰以縞繒相羈縻在北虜則借此爲媒利  
而擁氊裘邀歲繒且陽以部落相恐喝於以恣狼



書 卷之六  
三三  
貪於其側而覬覦非常之變漢鼂錯所謂諸侯王  
不云乎削亦反不削亦反削之則反疾而禍小不  
削則反遲而禍大今日虜情得無近是乎 廟堂  
之上其所陽爲不絕者不得不在此而其所陰爲  
力鬪者不得不在彼然則七鎮之間其所合各饒  
之以兵食而布戰將選銳鋒購死士襲部落非其  
所獨亟乎僕又爲公思之漢武帝元狩以後海內  
驛騷矣而桑弘羊輩不得不網罟山澤也唐明皇  
天寶以後乘輿播遷矣而劉晏輩不得不銖求鹽  
鐵也嘗覽公所疏請罷少府錢二十萬 主上

猶不從而况他乎近據福建所檄傳日本又囂然  
矣僕私計關白大約一梟雄耳或特威劫海上琉  
球以下附近諸夷之貢而未必敢深犯也然聞福  
建漳泉之椎剽少年其所竄入者旣衆當必爲之  
鈎引嚮道浙之溫台寧紹及杭嘉以下全以波濤  
魚龍爲州郡者也浙之督府亦不得不爲備嘉靖  
以來其所晏然輕裘緩帶者已三十年而一日起  
而從事不得不首之以廣製烏艚船遮擊海上其  
他所當別爲選摧鋒備火攻瞭海洋種種諸費恐  
亦不下數十萬也及按庫貯特懸磬耳旦夕當請

內帑及停歲解或他借鹽司關市之入不知公何  
以待之僕內抱漆室之憂外切知己之籌畫不寧  
食夕不寧睫者固懸懸也惟公留神焉

與賀道星秀才書

公之才譬則青萍也世之士固當識之豈謂又復  
荏苒留滯今年見輩師友間脫穎已盡獨公猶抱  
卞和之泣耳然僕恃公知愛不敢不爲一言大較  
公之文一切運格似臺閣冠冕處多而斌媚風流  
處少其所構思層閣繚垣處多而俯檻憑欄處少  
其所鑄辭魁梧奇崛處多而典則輕逸處少世之

之慧眼視之固當賞之休且炫而他俗眼視之抑  
或駭且厭矣科場中俗眼者什之八九而慧眼者  
特什之一二此僕十年前所嘗力剖肝膈面爲吐  
露而公則所坐杜少陵之癖其詩曰語不驚人死  
不休公得無近似之乎茲爲兒壻輩擇師席無如  
我公貢兒公之舊弟子也而紀兒亦稍知慕公者  
公倘不拒則不特明年而僕竊欲攀公遲之以二  
年三年請公登壇而兒輩閉帷洗心以聽之願公  
養成威鳳神龍之翮與鱗而併挈兒輩鴈鷓鰼  
或及附之以竦翅而點額茲則八十衰耄之所焚

香而顛天者也

再與石東泉書

寧夏之變數讀邸報所傳知上厯

主上宵旰

之憂而下煩我公之從中籌畫其所盈縮緩急弛張逾順蓋有縉紳士大夫之所不及知而羽檄烽燧間之所不敢泄者督撫將校以下大較稍稍有次第矣但其圍城中一則宗藩二則縉紳與脅從吏士而彼中狡且悍者挾之以沮軍興近讀詔書所馬上疾馳當已不復顧忌玉石蓋以棄之道全之可謂深獲要領而諸帥嫖姚之氣當什

倍故時矣不知近已奏功否僕衰且耄然少附朝請傳所謂與國俱榮與國俱辱茲固臣子所不忘溝壑而况公於中秉軸則又急故知共安危蓋有挂眉睫而切胸臆者如何如何

與兒縉卹唐比部後人書

丹徒縣故鄉宦唐公侃號默菴予令丹徒時聞其父坐負官庫銀若干繫之獄而公從諸生中告侍父於其側晝則讀書夜則擁護其父之寢食甚且夏無蚊帷而不敢輟扇也郡太守聞而憐之代爲處補前庫銀卒釋其父而出之已而中鄉試不及

第進士授永豐縣令頗多惠政召爲南比部郎久之以病篤聞予素習其清苦度無以爲殮也卽日措四十金馬上賫赴病榻間而公已沒矣其同官蔡白石侯二谷諸公共爲且悲且歡卽以所賫具殯殮當是時默菴公之子已先天所遺幼孫曰思忠纔十五齡公平生不治家以授學爲業僅沙田四十畝又以宦遊無貲以其田抵之門生某典史公之喪雖還而無以爲葬也我又別措四十金因約其同門諸友以義諭其典史典史君初亦恹色而諸友共以義責之曰父母官旣憐其清白吏捐

俸金若干矣而君以帷中弟子能秦越乎典史君遂以原券歸之思忠已而我復求唐荆川先生誌其墓而又鳴之學使者祀之鄉賢又恐思忠年穉且弱復請學使者給之衣巾守祠其事四十年往矣今據生員卞可忠卽思忠之弟子攜思忠之子某千里哀訴口稱予陞任後諸生情呈諸臺使者共爲移文優恤內開勘得默菴唐正郎歷官清苦子孫不能舉火殊爲可念查給入官寺田三百畝准令孫唐思忠衣巾奉祠其田坐丹陽縣地方去丹徒旣遠而地方佃戶朱孚盛等朋瞰思忠之文

弱輒佔而奪之於是思忠訟之丹陽縣丹陽縣勘明給還而各佃戶之負隅而虎噬如故也非惟此田之不得業而故所業沙田四十畝併以訟廢思忠之喪今且暴露不能入土悲乎兩生過我左右聞之並爲持酸欷歔流涕而况我追思曩日與默菴公舊遊痛其歿而卹其孤者今困踣若此能不爲之裂心疾首而泣下霑襟也乎今兩生之告猶幸於絕路中又得一線其事在少府高春宇公卽兒之同年而又相知之深者也兒可爲我千里走使持一書上懇之我細思其田旣屬三院所會案優卹鄉賢者而爲地方佃戶所佔又不以縣官斷還者而仍佔之如故無他諸佃戶譬則鷹隼之羣也區區一守祠孫譬則雀也卽如春宇公以故事行縣語所謂鞭長不及馬腹勢不能久必得春宇公親督縣令共詣地方丈量明白立一石書本末云云而別召附近殷實之家當官給立印信佃票其舊佃戶朱孚盛等按法重坐一二人以示戒庶得爲久遠計而前三院所行併今高少府公所勘當不委之草莽也不然高少府公陞任以去而其事又當如浮梗不免漂流矣

與張丹徒書

曩在華亭獲接公簪舄及聆公襟抱古所稱大雅之士穆風醴泉令人挹之神解飲之鬯懷者退而詢諸士大夫其所共爲語次之者嘖嘖不置口也今且以服闋再補丹徒丹徒僕四十年前所抱牒而過者時適比歲旱乾百姓掘草根斲樹皮以緩須臾之歿僕所匍匐窮鄉絕壑而與老穉相吐哺者於今耿耿也然而登北固眺金焦則江流若帶潮聲若嘯而間與二三知己晏歌其間又未嘗不杳然清秋明月之夜者公今過之得無按舊牘讀

殘碣而稍稍當公琴臺之側者乎茲以邑故宦比部郎唐默菴公之孫過草堂敢勒書奉候默菴名侃蓋躬古孝廉之道以勵末俗而非特今之人也其病沒於官而無以爲殮且葬而孤孫攜喪來歸也特篋中書數卷耳僕不得已爲之拮据其間其詳在所獻高春宇少府公書中謹錄其副塵覽今其曾孫應龍千里過僕蓋以僕嘗繕其葬祀之祠已而撫按及督學諸使君所採風而弔之共爲會案給丹陽廢寺者之田三百畝當是時邑之吏民無不人人歌且舞之者豈謂其孫孱弱而其田又

言 卷之六  
爲地方數十佃戶所朋佔及訟之故丹陽公已經  
勘明而諸佃戶之據猶故也今其事在高少府公  
而勘明之後其所處分當倚今丹陽公朱景峯掌  
握間嘗聞仁人之卹孤也如襁負其衰賢也若戶  
祝其鋤強暴也又凜然斬蒿萊翦荆棘也高少府  
公當必轉牒景峯公處語曰中流失維伏惟我公  
轉達挈千金之瓠而投之焉幸甚

茅鹿門先生文集卷之六

茅鹿門先生文集卷之七

歸安茅坤順甫著

書

與嘉興太守龔毅所書

聞毅所公近於城南煙雨樓別增臺榭星羅碁置  
遂使秀州之勝甲東南而封以內及客遊而過者  
之縉紳大夫騷人墨子日得以共間里長老相爲  
沉酣歌詠其間歐陽公醉翁豐樂二亭其當時賓  
客雖已散絲竹雖已沒而郡二千石之風流文物  
與滁陽瑯琊之勝猶獲碑之名山載之青史於今

書 卷之十 三十四  
膾炙人口爛然若日星者蓋有以也毅所公其幾是乎白鴈丹楓此其時矣其許我携尊壘過之否

與顧甥警韋侍御書

雷道士三齊間澹宕之士不冠不履特以賣藥遨遊山水間人或遺之金則笑而不受間一受遇他饑餓者輒與之人或遺之以衣與襪寒者過則又與之矣吾嘗欲結一茅菴以棲之且與之共爲基酒徜徉焉以老而夜來甥偶語及將有意乎物外司馬乎因遣童子導之左右其人似習熊經鳥伸之術者第吾猶不免詩文典籍之好間叩之彼或厭焉而不以語也彼當有以語甥甥且爲我轉相授受如何

與李濟南書

公海內名流也僕束髮來惟誦緇衣詠白駒區區好賢之私誠太史公所謂願爲執鞭者兒緡釋褐獲爲下吏稍稍聞公左提右挈而斧藻之譬之瘦木也而飾之爲文几暈石也而席之爲連城近讀兒曹所錄寄公之批答縣牒與一切教戒其所曲爲鼓鑄而訓誨之者德甚厚二三知己嚮欲爲僕移書左右而僕猶皇恐未敢請者懼蒙譴也豈謂



公之知愛又已出于非望之外而其情且如江如海者矣茲特具書陳謝惟公憐兒曹材質雖劣頗知嚮上其事父兄也稍習孝友其事公及他使君也必不敢不忠敬第慮其平生以潔白自將而或近於隘以愛民自好而或不諳夫時萬惟我公明德厚爲督策倘及如仲尼所稱獲上而治民勉爲寡過不至竊祿以貽地方之誚也生不能報沒不敢忘矣

與許南台大叅書

僕無似辱公由令海寧而權北關而督鹽運數於西湖山水間獲瞻冠蓋膝樽俎公數以國士寵僕而僕抑自忘其陋間亦從公吐肝膈傾心腎殆庶幾乎古所稱王貢之交者是已累數年來公旣讀禮山中而僕日以衰暮偃仰一室無繇附鴻鴈之翰遺之以音然而公之廉白之操忠信之德愷悌之政譬之穆風泠泠然常濯日星汎琴瑟而不忘神解者惟願公使節再臨浙上而無從也近以縉兒所從章丘遣使南還聞公且出叅山東而縉釋褐爲吏又獲從事幕府之末矣使不知僕附公綰帶交而呶呶焉槩語公之下車輒辱物色而與進

之公得無憐僕生平竊以其爲通家子也而骨肉之乎抑亦繇見曹之領印綬也頗及效職茲土而與之乎茲特具書一以陳謝厚愛一以仰申寥濶僕雖不及侍長者之側而縉獲從簿書間旦夕我公願公如睹衰遲也傳曰嘉其善而矜其不能惟我公無忘襟帶焉北望泰山無任瞻戀

與房侍御書

僕間嘗爲書以獻下執事又不能自通也託德清令君牒以聞而令君皇怖不敢或傳公之按州郡也郡二千石以上蒲伏不敢出聲氣故時一切鄉大夫關說者金不得行雖以僕之區區亦遂齟齬投之篋中矣累數月來使節嚮往語所謂山嶽且震不寒而栗者僕兒時聞山陰蕭靜菴風槩略相似雖然公倘聞漢雋不疑所關說暴公子者抑亦肯俯採之否乎方漢武帝以幪巾赭衣之盜半天下故特出直指使者持繡斧擊州郡雋生猶曰太柔則廢太剛則折願威行施之以恩然後樹功揚名永終天祿暴勝之卒爲霽威而兩人者功名金垂竹帛於今爛然也公得無意乎國家所升沉天下學校之權屬督學使諸督學使惟南直隸及我

浙為最難豫章及閩州次之何者縉紳學士之起家者眾其所亟子弟者什之九所能嘿而聽者什之一况諸生羣而橫議羣而郵口譬則稷下之士談天雕龍而炙轂者此其大較也僕竊謂督學使與漢直指不同直指所按擊者羣盜不得不盛蒐薙却請謁而督學使所領者博士弟子耳古者春日視學秋日行刑蓋有以也請公於法行後姑為浮沈一二其間如暴公稍為霽威故事茲亦僕所借雋生以獻者已故時高才生從博收遺才以錄賢書者往往而是魴鯁點額於龍門駑駘騁轡於冀野固僕之惓惓也書不盡言言不盡意去秋所移書而沈篋中者併上庶見鄙懷耿耿云爾

與周山泉通叅書

公之拂衣南歸海內學士大夫無不系欵太息者而僕特甚間讀傳記至賢人君子沈鬱下僚甚且伏跡巖壑未嘗不廢書而歎况公之文章道德僕二十年所寤寐而飢渴者頃雖赴召歷卿寺僕竊恨公譬之明月之珠連城之璧所當亟為飾之宗廟鎮之社稷而不當猶爾踳躄散地也古來豪傑其退也如决堤其進也如繫綦僕所以於公之進

未嘗不色喜而及聞其濡遲也則又未始不爲扼腕者如何如何長兒積辱公嘗席而教之不幸中歿仲兒縉稍及舉進士出令章丘語所謂失之東隅而收之桑榆不知公及聞否當必爲僕鼓掌者僕今且耄矣十年曠問偶星士董生過都亭特託抱書并函三十年來詩文之刻以獻中有五言近體詩一章蓋聞公曩日之起按察而賦之者以無他鴻鴈不及遺之以音也董生所按公卿次擢處如掌知公於仕路升沉非所問然楊雲之好君平當必不甚厭其緩頰而談也

與黃內翰書

唐之文章燕許沈宋以下大較襲齊梁陳隋矣韓退之出而力以六藝之遺矯之故及大振上接西漢宋承五代劉楊之體似秀麗而猥薄矣歐陽子出而天下之士始知通經學古與唐相始終我國家文章之運固不敢遽謂有韓歐者出而區區舉子業弘治正德來亦稍稍渾融典雅索索相望其時學士大夫亦及以忠厚博大翊戴中外嘉靖以下屢起屢躓然猶未及如近日詆諧軋扎甚且踰佚滌濫而放辟邪侈也公先後二三元老附離而

起岸然以斯文自任鏗黃鐘鳴大呂力爲驅天下靡曼之音謗薄之響而繼之古豈非吾黨厚幸哉歐陽公知貢舉入棘闈抗顏洗心思以滌五代相承之陋而其所首舉者蘇氏兄弟及曾鞏輩於時新奇自喜者金擯不收而歐陽公之撤闈也馬前遮噪而投石唾罵者沓至甚且不能前驅歐陽公奮不顧流俗以身矯之慶曆元祐間號爲多士而嚮所稱通經學古之俗非其功而伊誰爲之嗟乎文章之習與人心氣運相盛衰一二年來僕竊見廟堂間紛紛多故矣其所繇漢之田竇唐之牛李相爲出入固其勢然而抑或文運之薄爲之也諸元老執國于上而公輩翊運於下得無所以盪滌四海之士而爲之折衷乎嗟嗟僕老矣無所事於世矣獨於此不能不爲扼腕而悲拊膺而歎故爲臆臆者如此願公留神焉拙刻一十八卷敢爲附上僕之陋不敢望古之人而其所鑿心而鐫腎者於古之所稱非六經之言不以讀非兩漢之書不以觀抑或庶幾一二以自附於作者之堂不至於世所稱談天雕龍而炙轂者也不知公謂然否乞賜批竄寄示幸甚

與王東臺太僕書

金同安閩還以來書問甚稀然而僕之不忘左右當有隨明月而攬衣帶者王使君按節閩州時僕嘗賦詩贈之復口畫公之平生風概其以函萬壽表來歸也僕前探之彼第云公於其使節所嚮殊爲歛戢僕且訝且歎訝者訝其似疑於公而歎者歎其辭之戇而色之矜也僕三扣之又從而中導之彼遜言面謝故不敢以書相聞特條漢之一切聲名之吏功名不終者爲戒大較卽雋不疑所諷暴勝之者之略也頃之里中人共闕其以事獲罪當路且被指病褫職及再訊之或又指其所處分公家事并及長公且至不韙嗟乎何斯人者之情而至於此卽如公以鄉大夫家有不當閭里處特譴及奴亦足以無骫於法矣何必復驚朴擊之至是哉其歸也已三月猶未與鄉大夫相接僕候其廬不及見已而又瞰僕之他出而過之公家一本未於今猶未之聞也僕之長兒嚮嘗以房闈間或裂眦反目郡二千石亦以聲名沾沾自喜者遂閉之獄而死僕雖不敢怨而海內縉紳先生於今猶口之嗟乎僕聞公事語所謂談虎而色戰不

能不爲同患相戚同難相悲而歔歔以涕者雖然  
僕與公亦安之而已卽如 國朝楊文貞公以勲  
業蓋世猶不免茲譴山且崩江且涸日月且抱珥  
願公一切惟以自反厚爲沈晦或手莊周書一死  
生齊彭殤澹然超世庶幾雲將鴻蒙者之兩相顧  
而笑聊以延天年而託不朽耳如何如何

與徐吳江書

濟上來歸僕舟次津亭忽漏下二鼓矣時月明如  
拭不勝攬帶之思而城闔不啓遂挂席而南間題  
詩一絕猶未及獻也今特呈上公之縮印綬也四  
年于茲徵書旦夕下僕之衰遲偃蹇其所欲共公  
抵掌而談膝席而歡行且日遠矣聞公鯨飲倘徵  
書至日僕且移舟江亭願邀湖上七十二峰之色  
而共公一醉也不審公肯爲北道主否

與王會泉憲副書

縉兒甫釋褐一旦縮印綬爲吏公適按節過焉譬  
則遺幼子於道路間而獲慈母矣先公盛德流風  
僕嚮來所寤寐其生也不及握組佩綬於 明  
天子之庭而其沒也固當如古所稱鄉先生俎豆  
之於其社百世不廢者公今且屬表於其墓僕雖

不閒於文然不敢不勉爲斧藻頌述蔡中郎生平  
碑系之文獨於郭有道無慙色僕於先公當或似  
之太夫人簪珥間僕稍屬略非敢略也大抵婦道  
不徹惟故古以來惟赴焚殉縉之烈始得震耀當  
世其他鷄鳴以下不得不附夫與子男而旁書之  
矣然因言繹志其所點次亦足自見於公孝思抑  
或無負也已

與鄭雲石睦州書

公之由西臺出守睦州也邑之吏民相傳公乘輅  
由廣德經茗水賤兄弟携諸子壺漿以逆之境上  
已而尋聞公不果來故千里走使僅以書候而十  
數年來翹首鑱心蓋有隨公露冕而南者已奉報  
章中所垂念白首兄弟淒然滿紙僕移公之書過  
伯季讀之相對泣下當是時伯兄以七十九齡伏  
枕簟者累朞月矣猶共指秋八九月間沂江而上  
伏謁郡中不意伯兄病日篤體日尪羸卒之以重  
陽逝而季弟復相繼凋喪矣嗟乎生我兄弟者父  
與母而深憐且痛我兄弟者非公其誰訴哉此所  
以南望釣臺於今未及睹顏色膝冠蓋而索索枯  
肘也不勝惆然茲因相人者楊生歸蘭敢附尺書



揚之抱術與嚮所謂林生略相當恐亦今之許負也如何如何

與徐吾溪大叅書

僕無似獲附公通籍南宮已而仕路各爲翻飛冀之轅而粵之軫杳然不相及及罷官來垂三十年公旣秘跡婆歛煙霧之深而僕又家五湖巖壑間所稱社而飲社而詠歌者不能也然時時客從公之井邑州里來僕時時問訊得公杖履所嚮及共邑子野老相宴遊淋漓處知公以期頤之年嘯傲泉石徜徉麋鹿間殆亦今之綺季也已頃者縣令遣兩生過草堂敢附書以候倘借南來飛鳥之翮而遺之以音亦庶幾慰予飢也

與陳大酉理刑書

僕伏跡五湖之曲五七年前忽辱尊翁五嶽先生從淮陽遣使移書并函詩文刻屬予序竊惟五嶽先生文追西漢詩金大曆海內縉紳所共嚮往者久矣僕獲一言挂於其間豈非傳所稱蠅附騏驥之足乎然寔惶悚慙汗于今不忘也明公出爲會稽理吳越相隔盈盈一水下車以來明公廉白之操純明之德風流藻雅傾動一時僕所耳熟而心

醉賢豪之槩蓋有晝不忘睫而夕不忘寐者茲緣  
永嘉張山人之還東海也道經禹穴且盛稱執事  
之好士於一切抱九九之藝者不靳吐捕握髮廁  
賓客之列豈尊翁大夫而下旣世家學併及風流  
文物亦無間邪僕所以輒不敢避未同之戒而借  
張山人瓢劍所嚮而遺之以音也詩人有言曰未  
見君子惄如調飢不勝倦倦焉

與蕭少府書

客歲過姑蘇承公以文章襟期所嚮相爲縮帶而  
膝席公殆鼓陽春白雪之曲而下里之和者輒引  
之爲同聲若將共爲揚絲吹竹漱泉裂崖也世之  
文章家鑱刻自喜往往姍韓罵歐背棄六籍瓦缶  
雷鳴互相標榜然不知於古作者之旨吾不知其  
何如也公獨斤斤然持達磨西來之旨而開法藏  
眼首揭禪宗可謂不詭不隨而持之以正者已歎  
服歎服言別來忽已匝歲公於佐郡之暇其所下  
帷發憤而鼓鑄百家當什倍前聞矣不知何時再  
獲傾耳洗心以聽相曠旣久相念彌深茲特具劄  
伏候明教不盡所欲言

與大同胡中丞書

公按節朔方胡且款關不聞烽燧茲固

明天

子之盛而公共督府所同心戮力以內戢疆場外  
讐戎虜兵家所謂戰勝於無形者不虛耳僕少繇  
文學起家然於兵鈐抑嘗侈心焉竊謂縉紳大夫  
內則出入禁闥股肱

天子外則躍馬邊陲賈

勇沙漠庶幾古之勒燕然銘瀚海者流也間亦徒  
官粵徼抑嘗效尺寸矣然南夷特負固窟險之寇  
而北虜則古所稱天驕自冒頓以來世爲中國患  
者殆什且百之也公今懸幢莫府以輕裘緩帶之  
間而與鳴鏑死綏之虜相忘無事詩人之所以歌  
風萬里者

與莊陽山方伯書

山甫而頌周宣者何可嘿嘿也敬撰出塞歌一章  
以庶幾詩人之意其所不能盡尚有隨北斗而長  
遵巖先生沒而文之未墜在東臺太僕近聞東臺  
公所遭家難僕爲刺心分痛不勝快悒及問其自  
則牧鄉之士爲之祟也嗟乎東臺公卽或不戒稍  
於家奴輩薄示之法抑亦足矣何必爬搔復驚之  
及其子也太息太息近亦移書吊且慰之矣第貴  
鄉縉紳先生過浙者時時刺問之亦或稍稍併訾

東臺公僕嘗聞宋之超曠之士若种放抑或蒙羣  
小之詬然在吾黨不可不引他山之石以重爲戒  
也知公骨肉間幸亦以僕所云轉而聞之如何如  
何

與羅文洲比部書

去夏過淮南辱公不忘舊日之所吐哺而顧我腹  
我者爲之繾綣殷勤令人見而彌親別而彌思于  
今猶耿耿不忘衣帶也若上之風與曩時不同大  
較郡之視縣如束濕薪縣之視鄉大夫如机上肉  
其所於法外爬搔真不寒而栗矣至於閭里呼嘯

子殺父妻殺夫又或翁搥婦金置之不以罪傳曰  
刑罰不中則民無所措手足公得無憐之乎湖之  
吏民及諸縉紳所共追思公與鑑池之德而謳歌  
之尸祝之者切切也僕離行省已踰年飲食羸薄  
如舊重以家兄弟凋喪此中殊惡茲遣二僕過章  
丘道經莫府敢具尺牒奉候起居而并前所不堪  
者云云於左右日欲父母知慈子之去其懷者固  
如此而甚矣其爲歛歆也

與趙麟陽中丞書

僕於丘壑中閉戶息機譬之伏蟄之蟲矣顧暮月

以來邸報所傳與士大夫所口聞二三材辯之士  
簧鼓譎訛頗似公孫祿息夫躬輩之於漢邢恕蔣  
之奇輩之於宋廟堂諸老殆跋胡疋尾間關次且  
而不能爲情者幸而天啓 聖明諸公又稍稍

持衡其間國是漸定橫議且息或者猶謂彼皆少  
年盛氣內挾宦豎中搖王室一則欲借事以擊其  
所忌一則欲乘其間以援其所黨將以壅蔽日月  
而後移易江河其爲國家隱禍且不測迺若公以  
素絲羔羊之望抑亦間被指訶豈讒說殄行震驚  
朕師自古記之而然邪竊按傳記所載權臣持國  
阻抑言路君子於時持之固難今執政者以博大  
爲體列言路者以諫諍自用至於黑白混淆貝錦  
朋興於是時也則亦譬之沸鼎矣嗟乎公輩第如  
古所稱公孫碩膚赤舄几几嘿以聽之而已僕雖  
衰且老於我公蓋不能以處江湖之遠而忘 朝  
廷之思者特因鴻鴈之便稍附一言於筆札所不  
及者猶懸懸若千里之河而注之海也

與少司寇姜鳳阿書

僕之不及接簪舄聆宴言者十餘年于茲矣而公  
以文章侍從之舊傳所稱 天子之師傅國之

書 卷之一 三百五十五  
著蔡是也海以內縉紳學士所擬公之拜麻柄政者朝且夕召還以來猶爾畱滯周南何也豈中有忌且阻之與抑亦邇年弘恭石顯輩稍稍用事而蕭望之周堪金儒臣宗固有於中相爲抵牾者與不然何公之望若彼世之公議若此而猶翱翔而不進也悟齋公入朝後聞一二執政稍稍推轂之此亦可占王陽在位而貢禹彈冠者之兆矣偶有善望氣者胡生頗名五湖間今且過金陵倘公賜以膝席而占之當必能以帝夢之協隨春風而聞茗水之上也不盡

與吳悟齋少司寇書

言別來忽已數年僕之年日以增形與神不能不日以稿而其嚮往之情則猶寤寐不忘譬則明月白雲時從公於赤城石梁之間而無間於朝且夕者丘壑間絕不知戶外事秋深時偶有客携仕錄來知公且赴召矣不勝躍然爲 國家慶竊思公之釋褐入仕來三十餘年于茲中外之士所共以賢人君子出處進退卜其隆污盛衰者有三何則公官司諫時所當執政擅權濁亂海內公以其身抗日月逆雷霆卒之犯 主上之怒而九死不

顧固一時也已而山陵晏駕詔召諫諍諸臣  
 公且還舊職晉中丞徘徊舊京稍稍翱翔矣未幾  
 田竇交構隨被指病擊之以去又一時也邇者  
 天子仁聖而諸公卿間所共以博大忠厚翊戴其  
 間可謂盛矣一二年來又不免如息夫躬公孫祿  
 輩之於漢蔣之奇邢恕輩之於宋甚且挾中官以  
 搖乘輿或聞縉紳先生道路以目而公於其間  
 外倚匪躬之望內切自牖之誠恐亦不無易所稱  
 多譽多懼又一時也嗟乎鳳凰出而百鳥之所以  
 奮翼而和鳴神龍見而羣鯨之所以揚鬣而煦沫

公所轉轅易轍何以爲情僕於草莽中惟願公不  
 兢不綵百祿是道外則領袖善類多方推轂內則  
 雍容肘腋共叅朝政僕倘未卽填溝壑願附古  
 人慶曆聖德時以歌詠昭代云耳公得無許之  
 乎僕廢已久日且向盡兒曹稍及通籍明時縮  
 綬出令然不知其能償父未展之志否行且上計  
 闕庭當以通家子問候帷中幸公膝而教之孔門  
 於諸弟子之入而問政也所載之家語魯論者言  
 人人殊大略倉公扁鵲隨病立方願公視之猶子  
 無靳一切所以淬其鍔而礪其劍者以要之於道

茲則僕之望也

人人與居省心書

郡太守之高第者大略金擢臬副而公以循良愷  
悌聞者久矣今且領苑馬竊謂國家南北之馬  
金領於太僕寺間又有行太僕以分領其不逮矣  
而陝西則復有苑馬者豈卽古之秦非子所羣而  
牧者之地與抑亦隋唐來中國數以茶易西番之  
馬而公今卽其職與然又聞特兼憲職當必以茶  
馬之使與中外羣小者之夤緣爲奸其勢不能遽  
行於郡縣有司之間故特加之茲秩以攝而行之

與少嘗覽楊文襄公所領茶馬都御史之疏竊聞  
其得不得之槩今已忘之而僕之愚則獨謂當官  
者不特高爵重柄也繇孔子委吏乘田觀之吾輩  
苟拜一命唯求國家之所以利與其所以害徐而  
思之如農之有畔必得其要領要之久而爲來哲  
者之鏡可也公其得無意乎西北雖苦寒而南人  
過之大都於飲食風土多便何則脾喜燥僕歷仕  
途二十年數過河以北則諸病俱却所不便者惟  
去故鄉六七千里家書無繇易達耳同鄉如許敬  
菴督學及戴太守公則公之家書亦可時時尋便



寄貽者而臨輦兵巡道朱君則僕按大名時之帷  
中弟子而恩義最篤者僕僉欲寄一書以通殷勤  
之思今不能及矣語次乞爲致意

與石東泉書

僕朞月來門戶坎坷頗多鞅掌所私慶者聞執政  
持博大避權勢夙夜在公簡厚處軸而二三知己  
鱗次鴈翔布列王塗庶幾唐宋皇祐慶曆之風與  
我 國家宣德弘治略相似可謂盛矣然據邸報  
所傳與縉紳先生擁轡軒而南者間或口畫譬則  
公孫祿息夫躬輩內挾宁貴熒惑日月或爲懷驚

或爲乳虎諸公卿間甚且道路以目豈讒說殄行  
震驚朕師唐虞之盛自古記之與猶聞荆石相公  
一疏稍足以徹 主上冕旒黻纁之蔽紆士大

夫之憤而奪其氣嗟乎僕老且衰矣山亭石榻支  
頤抱膝惟上以歌石介所詠四賢之詩而諷誦朝  
與夕耳兒縉令山東頗知推公之教洗心勵志誠  
如公曩日所諭聲問稍起傳不云乎靡不有初鮮  
克有終惟我公膝席而教之大略縣有司之於民  
當如父母之於子一切吐哺家給而戶足須爲百  
年利弊之思古人所謂甘棠之愛尸祝茲土可也

僕少頗以勲名自奮中道忤世垂翅來歸公所於我而嗚咽者幸於兒曹而鑱刻也久疎音問茲以兒上計 闕庭敢附一言

奉漸菴少宰書

頃歲携家過濟道經淮南獲望顏色聆簪舄公祖賜之以國士之寵渥之以故人之情其所繾綣殷勤譬則披穆風而飲冽泉令人神解於今猶寤寐無忘者 聖天子在上賢公卿在下而公以夙

望召還天官朞月以來其所進退天下之賢不肖而內持國是外協公議詩書所稱唐虞商周下及慶曆元祐之風謂古今同不同未可知也盛矣盛矣追記曩於莫府獲覽潘印川司寇所抗疏時事僕竊壯之公獨爲扼腕而嗟僕猶愕不敢信已而卒坐反之者以惡聲相蒙幾陷不測僕每歎公知幾且聖矣要之公以素絲羔羊之德領海內耆蔡典刑之望其鎮定如山其湛深如海古所謂招之不來麾之不去而國家行且倚之爲阿衡席之爲石畫蓋有以也雖然一二年來聞 廟堂之間爲二三君子所熒惑濁亂者抑多矣公於其間亦不無如易所稱多譽多懼而大臣以身當天卜之焚

以權解天下之亂其道固如此僕待盡丘壑然於世之陰陽消長否泰升沈處抑未嘗不鯁鯁於心思間故輒爲傾吐者如此然當蟄而吟公得無怪其非時乎不盡

與錢秀峰侍御書

海山先生令遂安時於省闈中覽僕文而錄之當是時僕幾爲他校文者所擯而海山先生獨奇之以爲國士居恒思奮報知己而未能也海山先生罷官歸輒以負俗之累爲羣小所詬居第田園歌舞紈綺不崇朝間盡爲市井惡少者所劫而奪僕

其門下士也焉得不痛心裂肝潸然出涕而思一振袂攘臂乎已而海山先生與夫人相繼沒抑間嘗遺棺以殯之然諸子飄零譬之失林之鳥楚之憐叔敖之後行歌負薪者猶能奮優囚感莊王而僕於今卒末如之何者嘗記憶海山先生於族屬中獨奇公爲高材生公旣第進士爲名御史僕近獲湖廣試錄手而讀之公於舉子業蓋所謂絕世無雙者然非所以窺公之大也公之大當有近之與范希文遠之與晏嬰輩砥行礪業震耀今古者然則收族之貧而衣且食之與所謂待臣而舉火

者七十餘家非公其誰望之錢生過所口誦公嘗遺之廬而收其刺繡者之婦媿媿不置口公之誼甚厚與范文正輩相伯仲且不自負海山先生之知者敢不勉爲尺牘以謝而他所不敢請請而不敢盡者猶之懸千里之河而注之海也伏惟垂憐焉

奉陰司空書

僕吳之慵且耄者也古人以未同而言爲戒而况公以勲業聞望名當世者豈可遽爲尺牘以瀆記室第僕與故司馬蔡白石公束髮爲文章交已而又爲兒女姻而白石按節蜀徼還數口畫眉山巫

峽之勝輒自喜於蜀諸文學首獲公不異張乖崖之於蘇軾兄弟也僕竊嚮往之太史公之傳晏嬰也嬰且異世願爲執鞭焉而况僕猶及公同時而生者乎白石公海內名流也其以詩歌詞賦之雄羔羊素絲之槩領衷縉紳士大夫抑已久矣不幸五十而歿所遺繼室吳夫人僅年十七而孀所遺兒炳齊僅五齡而孤當是時門戶之不絕者如帶矣一切圖書園林金爲族里者之所瞰而羣而毀其廬豬其池楮其山甚且陰賊其孤以爲利僕同鄉大夫顧尚書若溪董宗伯潯陽而下共爲揭之

撫按藩臬及郡太守諸司而適楚中謝公鵬舉朱公炳如胡公定輩相繼來浙金白石公所故守衡時帷中士也故及稍稍鋤其荆棘極其寢衛白石公始及葬而所遺孤與寡僅僅至今日其孤炳齊以任子補官光祿署改判惠州出未幾客死濟上嗟乎何天之不祐善類而慘戮若此別無他產男女聞房中姬有懷妊者特數月耳嚮族里之所爲毀廬濬池與赭山者復相嚮而鬼瞰於其左右夫人以下日所擁內外僮婢烝烝若鼙鼙之待命於丘隴者耳公倘有趙武子之憐得無欷歔流涕而爲假手以援之乎今猶幸有德清令陳君岷麓其人固長者抑亦雅憐白石公故嘗有遺愛在蜀數以身翼之且許爲擇族中之賢者後之語所謂中流而覆而天假之以千金之瓠也然陳令之報政五年于此不久當以徵去陳令去而蔡氏且爲杞上肉矣公方席中外之望譬之登高岡而順風以呼則川谷且震也願公於白石公之生也愛其人其沒也惜其樹併其宿草且遠得以續謝朱諸使君者之業而近復善陳令尹之後茲則仁人之賜非獨僕輩頌公之德卽如白石之遺骼當必思以

含哀奮報不忘結草於九原者已臨風嗚咽涕洟者三不勝瞻切

與徐賓梧驗封書

西湖之上獲逢冠蓋以來忽十年于茲而見縉繇章丘令入覲間過省邸聞公賜之從遊公其憐我丹徒及尚書省金屬同官之末邪抑亦公之素絲羔羊之概僕雖不能似而或亦有臭味相近者邪然僕以還山久譬之羈樊之羽伏櫪之駟而威鳳之鳴於高岡神驥之騁於康莊雖當張翼竦翅獵驟跑足而不敢以聲問相及者其勢隔也而公方以盛年雅望海內縉紳學士無不睇其末光而慕其流響語不云乎王陽在位貢禹彈冠知公所從中領衷賢哲推轂豪俊而好士之聲當有甚於天下之士之求之者如流泉如鞭霆矣僕固無及而兒曹稍知讀父書抑或抱父所賚世以沒之志而蹀躞其間者不識公肯賜之教且左提而右挈之否

復王敬所書

言別已久馳情如渴適得吳生所持書開緘讀之宛然揖公於天台石梁之間而待揮塵接唾壺者

躍然躍然季公又高第而河東三鳳星聚綠野之  
堂矣僕故嘗憤世之不能用騏驥驂駟之材蹠蹠  
沙磧而千里名駒且翩翩接踵而連轡矣公之所  
得不既多乎然老驥伏櫪得無望北風而猶長鳴  
邪西方之說誠是誠是語亦有之此亦大段着力  
不得吾輩不能習熊經鳥伸之訣思以長生於世  
而亦不必遽爲貪生怖死以着魅於其間直聽之  
而已如何如何吳生之丹青屬佳品僕以赴公西  
湖之約不能錮山齋而羈畱之當爲緩頰諸公間  
聊以慰其仗劍而遊彈鋏而歌者之思也相見在  
卽不盡不盡

與萬婺源書

僕衰且耄然獨好覽古傳記及嚮慕今之豪雋奇  
崛之士縉兒第進士聞出自馮太史房已而覽睹  
明公墨卷與經房所哀刻諸作甚矣馮太史帷中  
多奇材劍客而明公則又冠軍侯也頃聞抱琴出  
令婺源徵之賈遊入湖者時時過僕隨扣之亦時  
時次明公之善政津津乎有味其言之也僕不能  
入其疆采其風偶有友人李文仲者西遊白岳且  
囊所爲詩與畫行謁張祁門公僕謂之曰君稱祁

門公嘖嘖不置口獨不識婺源充今之楚楚者邪  
僕解其裝得其故所爲詩若干什與其畫數幅願  
明公臨觀焉倘與進之或亦朝川之裴廸蘇州之  
秦系也家藏三稿數十卷附上聊稍申求教之私  
云耳

與石東泉少司馬書

縉兒入覲聞公左提右挈而厚爲督誨之及覽手  
書又借譽似過得非愛之深而不覺言之溢已乎  
別諭云云公所同麟陽悟齋諸公內當國家肘腋  
之間而外以持博大渾厚之體以相爲省括解焚  
於其際詩人不云乎夙夜匪懈可謂忠亮之至者  
已竊按古傳記所載往往安危治忽風歛雲蒸何  
者天下之勢與天下之權必有所倚權或移於其  
所狎則勢隨傾於其所附譬之奕棋者然分子布  
筭而彌累隄防於其間特在執政而公須與一二  
同心多方推善類以備緩急此其時也僕本丘壑  
待盡之年而絮絮及之願諸公所繫中外周堪劉  
向之望者注心而已所不能盡與不敢盡者猶懸  
懸千里也

與費唐衢大叅書



僕無似辱公握手出肝膈屬心膺且要之白首甚矣古人之誼也所屬碑文何生及兩校過草堂僕適過京口比歸又抱病伏枕席者且匝月故於五月九日始得面睹何生且云公尚留滯故里以待僕屬草也僕卽日繕草以獻然特紀公提浙兵本末而公之生平宦轍所嚮不敢一一詳之文中倘再詳則似古之生傳與生誌非所謂碑去思也僕所見如此然而公之材猷勲業已爛然在眉睫間矣不識公謂然否

與吳悟齋少宰書

頃奏記室所請公推轂善類翊戴國家知公當屬同心聞鳳阿公隨徙南司寇公之轉圜已槩見矣然新鄭江陵相次執國其間海內豪雋之士繇田竇相爲廢興繇王傅相爲出入以一切愛憎之私而隔絕天下之賢者猶索索也公貳吏部爲晉山濤爲唐崔祐甫爲宋司馬君實令國家獲藉公橐中所貯以備緩亟非公之百年之事業乎僕雖衰待盡丘壑於古人所稱願朝廷用好人猶不忘眉睫也公謂然否偶蘭谿有抱相術者楊生來遊京師請公姑留帷中試之渠雖年少頗于塵埃間能

識異人故敢不恡一言也

與陳德清岷麓書

故德清史直吾公涖縣三載雖不敢擬公然亦江南良吏也其被讒而左遷吏民共太息而寃之頃移家謁選過京忽旅亡省城蓋六月五日也僕夜來於守巡兩道席次始及聞不勝泫然茲且過哭而脫驂以賻之矣聞撫按以下金爲投金助喪且給之以故官郵符而一切衣衾棺殮金錄守道紀綱之然縣中吏民恐未之聞也茲特附告公倘憐同官念其嘗有德於縣之吏民也一切鄉宦舉監生吏及民間殷富而有力者不識可發一傳帖而下諭之否僕令丹徒及按大名道時有寮一簿有屬一郡司理金不數月而沒於官僕特呈撫按兩臺及行按屬且併給一印信簿於旅殯之側遣吏人於其助喪而過者卽登記之已而簿獲數百金而郡司理且千金公仁人長者也不審可席而施行之否

與余襲溪太守書

竊惟古之名二千石若南陽若渤海若東郡若潁川金慷慨倜儻多大略然亦以地僻位重無他監

臨使者彈壓於其上與夫過客者之擁傳於其下故得以孳孳撫循以漑田種樹弭盜興教各各其職大較其得以盡心民隱者什之九而以奔走供張市道交者什之一故也若今之杭一都會也地大物衆人煙輻湊者數百萬家上有中丞御史諸持節使者星錯而臨又多佳山水及宋南渡以來輦轂臺榭之遺而四方縉紳大夫之乘輶而過與吳越間冠蓋之族往往旦且暮焉故其奔走供張者且什之八九而稍得秉燭治文書聽獄訟者什之一二而已故非靜能勝躁察能勝狡幹能勝瑣者不以及而明公下車來不朞月間而士大夫與吏民之交口而譽者蓋什伯於曩時也予間過謁明公不獲見第於明公之間過也望其貌察其氣蓋深湛醇粹皎然若冰壺盎然若穆風而於其中則又持之不激不隨不苛不弛古所稱純明君子是也故於前所云什之八九什之一二金不得以雜揉於明公之左右而得盡心以視職頃過西湖與敬所王司寇語次明公王公所嘖嘖稱不置口抑大較與僕所見一也嗟乎明公異日之蒲秩而以治最聞於

明天子而史官所書非古之南

陽渤海而下乎家刻數十卷則僕生平好古與其  
願効當世者之區區或在焉故敢獻上請教惟明  
公憐而賜之塵覽焉

復蘇杏石書

僕以文章辱先司馬公之知然亦以文章爲妬口  
者所讒之執政指病而去卒不能爲國家建尺寸  
以奮報知己南北之鴈久已濶絕忽兒曹遣使來  
歸獲明公所移書不勝跫然喜及啓封覽之始知  
先司馬公以故督學江西時或於斯人乎稍相枝  
柱起睚眦輒爲招引告訐而毀其廬散其業不勝

錯愕泫然索歛者久之已而讀至篇末則其曲直  
已原而伊人者所籍口郅都寔成之遺以快恩讐  
矜聲譽今安在哉再讀碑誌及從祀歲曆諸刻而  
先司馬公之勲名道德已爛然朝野矣明公能以  
仁人孝子之心發先德飭國典不可以見明公之  
槩乎踴躍踴躍頃者縉兒令章丘適明公以王官  
過焉鄒枚侍從之暇出賦兔園詠梁苑而兒曹亦  
得以通家子翺翔簪裾間知明公必爲開襟而教  
之僕衰矣年且七十五天猶賜之以筋骨之強時  
從杖屨娛泉石而間錄宴酣之餘以詩賦嘯歌狂

謔五湖間蓋於古原壤不能不顧影而咲也明公  
以爲然否

年登譽令安并姑再蕭野菴又新所編習諸  
日取而野人昔也口徑階寧知文貴以財恩警  
證對或然察者香久之口而蕭至論末限其曲直

茅鹿門先生文集卷之八

歸安茅坤順甫著

書

上李漸菴南太宰書

僕伏海曲竊見學士往往稱臯夔稷尚萬世爲人  
臣者之考鏡且謂絕德非近代公卿所及者僕獨  
不然間覽宋真仁英哲之間李公昉寇公準王公  
旦韓公琦范公仲淹富公弼歐陽公修龐公籍趙  
公汴司馬公光諸君子之入朝則雖雖然推賢讓  
能如不及絕不以世之忮求愛憎之微介乎其間

而退則無請謁無苞苴甚且推轂世之賢豪倜儻之士而其人不及聞不以謝之私室者故當其時海內譽髦後先相望三王而下此其最盛者已我國家宣德弘治年間稍稍近之若我公者非其人乎何者僕嘗謁公望公貌絕無世之塵埃也及扣公公席而膝之相與揚摧古今品隲當世公於世之賢人君子則好之若水之赴壑及聞其他過也則又疾首蹙額而不以及絕無城府崖塹毫髮之私介乎其間也頃者二三執政亦稍稍於公相爲倡和於曩分宜華亭江陵間一切黨同伐異之風不少見焉然則詩之所謂素絲羔羊肅肅兔舛又何異乎僕嘗私謂宋之真仁英哲諸賢卽虞廷之臯夔稷尚可也若公及頃之二三執政抑卽宋之真仁諸賢亦可也茲聞公繇少宰出典南吏部竊欲跨一驢間走秣陵伏候起居併聆公之二三年來所不聞者之遺論而秋八月來病魔糾纏兩肘如枯楊之枝矣不敢出門戶敬遣一介之使問候於左右伏惟垂憐而俯亮焉

與萬思默督學書

頃者葉文抱公書開緘讀之其所掀揭宇宙俯仰

古今大較可掬至於論文一節公所自得鑿去世之影嚮勦掇獨犁然有志於古之道茲或僕平生所自好而學焉而未能者公且擘畫及之僕安敢不自鞭策尺寸之間以求正於高明也乎第耄矣語所謂老驥伏櫪志在千里其壯心雖不已而恐日昃之晷有不能前驅而馳且驟者茲於葉丈之勦遊而歸也敢報之如左外八大家刻一部附上韓歐以下近來文章家且謂漢西京後薄不足爲而僕則妄謂八君子者其材之小大不同要之於六籍以來相傳之旨似各能獲其雋永而爲之者故一切鐫評並爲指次如此僕故知不免爲世所嗤笑而今且得公印證頎然與之語不云乎苟同於道雖不同於俗亦可也

與陳大酉司理書

僕辱尊公五嶽先生不鄙屬序詩文刻故及稍稍移書相酬次而漢沔之流與勾吳之波數相掩映而吐吞也明公舉進士出爲越州理而兒曹又竊附榜末故以通家誼時時相問遺而明公襟抱如在眉睫矣然初不知五嶽先生卽傳少巖司徒公之甥而先師非泉膳部公又故嘗於令祖蘇山先

生爲縮帶交頰者來生汝願携姪孫拱日過草堂  
偶爲語及且聞明公過越州來其所憐來氏兩生  
賜之從遊左提而右挈之者若穆風若甘泉令人  
披且飲之者神解而心醉也然僕抑嘗從非泉先  
生故亦嘗竊附少巖公文章道義之知由此言之  
則明公又或移其所以憐來兩生者而併不忘衰  
羸又可知也望望星河盈盈一水故於兩生之還  
越也再附一書以獻別有家刻唐書五代史鈔一  
帙則僕故所讀歐陽永叔之文而妄謂其史學獨  
得司馬子長家法而因以鐫次之者敢併呈覽不  
識明公以爲然否

與顧蘅字督學閩中書

石門言別忽已歲暮嚮所共公面訂督學事宜謂  
攝吏當以嚴陶冶諸生則以寬此則士大夫之所  
共知者而又欲公於考校外須於諸生之抱德行  
道誼及嚚詰頗側者深加分別而提掇而鼓鑄之  
從而恤其疾苦賑其貧乏解其冤抑博士之所知  
而不能庇有司之所忽略而不以問者特願爲加  
意焉此或士大夫之所不知卽知而未必畱心者  
辱公點頭而許之然入閩以來不知公間及俯採



以按行之否僕之茲言也故嘗於王敬所之督學  
江西也或及之近於許敬菴之過關西也又稍稍  
詳次之王敬所去江西三十餘年士大夫猶能無  
忘其愛而敬菴公則秦隴之士近所軒頤而頌諸  
中朝者不異文翁之在蜀矣公今之大賢也其心  
之澹然若水其襟之盎然若穆風僕故知公之行  
部視學所嚮諸生之所誦法與士大夫之所口畫  
而心漑者萬之矣倘及朔風幸爲投寄所下案驗  
科條及諸生考卷之最雋者令僕獲手而讀之茲  
則公所不遺故人於千里之外也

復陳五嶽方伯書

春以來僕病足臥山中忽得公所遣使携二書至  
其一則論文章之旨而併屬僕以記所謂六美堂  
者其一則由續得劉生所囊訟冤書而因以報之  
者也僕衰朽譬則秋江之萎梗其所汨於流波沒  
於崩沙而朝且夕焉待漁人之拾且爨焉不可得  
已而况辱公之注記乎又况辱公投之以文章詩  
歌之什甚且先大夫蘇山先生所從竟陵訪陸羽  
著茶故處而堂且歌之此一段風流澹古所稱  
物外司馬者之流也併屬僕記之得非公之好士

而不以九九之末遺之者乎僕竊欲畱使者累日  
或稍遲足瘍之解且當濡毫記公之堂而以復之  
也使求去甚亟故不及然公所首諭僕嘗謬論文  
章之旨如韓柳歐蘇曾王輩固有正統而獻吉則  
弘治正德間所嘗擅盟而雄矣或不免猶屬草莽  
偏陲項籍以下是也公又別論近年唐武進王晉  
江以下六七公輩亦足以與韓歐輩並軌而馳者  
誠然誠然然僕之鄙則少自結髮所鑿畫古作者  
之旨而偶有所自好不敢不吐於長者之側也李  
獻吉樂府歌賦與五七言古詩及近體諸什上摹

魏晉下追大曆一洗宋元之陋百世之雄也獨於  
記序碑誌以下大略其氣昂其聲鏗金而戛石特  
割裂句字之間者然於古之所謂文以載道處或  
屬有間文之氣與聲固當與時高下而其道則六  
籍以來所不能間者僕少嘗與蔡子木論文書竊  
謂天地間萬物之情各有其至而世之文章家當  
於六籍中求其吾心者之至而深於其道然後從  
而發之爲文譬則金之在冶而種種色色無不得  
其鼓鑄之真卽如僕所頃次韓昌黎輩而屬之八  
大家漢之崔駰蔡邕晉之左思陸士衡齊梁陳隋

以下非無龍驤虎鬪之士而八君子者之中曾子固殊屬木訥蹇澁噉之無聲嗟之無歆者而僕猶取之以其所序戰國策諸書及記筠州宜黃學諸文蓋亦翩然能得古六籍之遺而言之者已要之非世所謂翡翠珊瑚刻鏤勦厲之飾而爲之文者故蘇長公嘗稱韓昌黎文起八代之衰其所指者固在此公謂然邪否邪倘公然蘇長公所云昌黎特從唐中葉起八代之衰則崔蔡左陸以下金草莽偏陲可知之矣又何疑於獻吉乎獻吉云云如屬非妄則唐武進以下又可差其或上或下或旗鼓相當或鴻鴈相次當較然矣任少海所意不可於世而自負其奇且謂世無柳宗元或然或否公又且一笑而謝之矣僕非閒文者第其所自好者在此故僕幾欲燬去生平所爲覆瓿者之藁倘及秘蹤石室者之深而囊六籍以深求心之所至而因自老焉或庶幾其仰窺什一也今且衰矣疲繭不相及矣公得無憐而教之乎謹於使者之草屨而南姑復之以所云而公所屬記六美者之堂聞令郎大酉行且按湖中僕當前扣其堂之佳山水所嚮處勉爲公挂一言於層欄曲檻之間第恐猶

屬嚮之草莽偏陲者所云不足以慰公之深情也  
與石東泉少司馬書

世之論司馬之職者在知險隘擇將領僕又妄謂  
兩廣滇蜀之險隘與北虜東胡不同而其將領亦  
因之以異何者北虜以牧爲家其所爲部落也擇  
水草以自便利其擁衆而入也以鐵騎數萬其疾  
戰也如崩山如疾雷故其所稱險隘當扼虜之吭  
而拊其背而其將領非其習兵而伏險出奇摧鋒  
陷陣者不以與也至於兩廣滇蜀之間其所當首  
長大較戀巢穴長子孫非胡虜比而諸將領當以  
輯和拊綏爲上以簡戍卒審嚮導爲權而至於不  
得已而用兵則惟以鷓勦爲最決不當如近年動  
輒請兵十餘萬而事大征者蓋大征則多調兵多  
調兵則輓芻糧按部署假日月賊之猾且健者僉  
走險以避矣已而所疏聞斬馘大較特係累其老  
弱與中國之被虜甚且襲殺無辜者以爲功耳此  
則僕按節南粵時所聞往牒詢諸父老而得之者  
由此言之則一切諸險隘將領固當於中權其南  
北而善爲之矣然不特此也僕又嘗妄謂吏部所  
權者天下之進賢退不肖而至於邊徼之提督與

諸兵備大司馬所當一一咨訪一一摩畫而與吏部共分之者何則漢唐之舊其兵權在將軍都護與諸節度使而我國家則權之提督者什之七卽如挂印猶不得私爲發兵也故愚獨謂諸邊徼提督節鉞使者以上須擇文臣而知兵略識事宜與其跣踵不羈足智多謀者爲之恐不當按藩臬及中朝卿寺之攝衆望者魚貫鴈次而代也苟其才指可辦卽如古之二卵以上與謗書滿篋皆所不棄也至於兵備則地方之緩急夷情之出沒與夫一切練軍實簡將士金其所掌世或不免例擇其簿書筦鑰之慎者克之抑亦過矣故愚謂中外之士所堪諸邊徼之提督與其兵備者職方郎須共司馬與司馬之貳密爲簡擇某堪某處兵備且可以待次而領提督某提督且可以待次而領總督因以聞之吏部而吏部又須虛懷以叅之因以聞之執政譬之庖人者之調五味樂人者之和五音務使酸鹹辛甘宮商緩急各適其宜而已當是時外則權天下謀略之士而內則以其身與心深入於吏部之長與其屬令其不我猜不我忌嗟乎於此抑亦難矣非公不可以此自待非公不可以

此望之吏部而僕之鄙陋嚮嘗竊識公於弁髦時業已卜異日當爲國家石畫臣不特區區掇科第曳金紫而已者數十年來公之上下古今出入中外其所博識而深中者當有江海之難以蠡測象緯之難以管窺而僕又衰且耄其所自好者如彼而其所自蔽者則又如此恐不免井鼃之跳堙露蟬之哦枝而已也伏惟公之不厭而少爲籌畫焉

與楊侍郎本菴書

近得邸報及縉兒從濟上所移書乃知公之不遺兒豎而錄之葑菲甚且以僕舊嘗爲先太傅公屬

吏而鯁鯁然有故人世締之愛焉感激感激然而公所指次僕之去官狀非繇河魏時獲罪也蓋繇少嘗獲微譴於故執政其蹤旣疎其釁漸深而同門之忌從而陰構之者愈力故僕之罪遂不可解一則繇吏部出判廣平一則繇南禮部出僉粵州又不意於粵州稍稍獲尺寸矢石之功遂徙爲大名兵備副使蓋嘉靖癸丑之冬十月也胡虜庚戌內犯後部題防秋特請割順德隸大名道專一勅歲提兵三千人赴倒馬關以遏虜入故大名使之戍邊自僕不肖始當是時中朝士或指爲故執政

所銜者未之釋第欲以此構之罪也或又云先太  
傳公間聞僕不肖於粵州時嘗以知兵名故附錄  
之措置如此未幾先太傅公出督薊州僕雖不能  
從之出入臺障間然抑時時奉指揮練將士飭戎  
馬一切枹鼓旗幟弓弩戰陣或謂稍可備緩亟已  
而撫按巡關諸使君並交章疏薦之出肅皇帝  
甚且推轂謬謂可當節鉞已而僕之坐罪蓋籍府  
江匿斬馘者之賞爲按也嗟乎僕豈敢爾哉且僕  
是時特勒部下鵬勦前後俘斬殆千人不煩軍門  
一卒之力一金之費而顧以此罪僕削籍此或先  
太傅公之所深憐而刺心者然是時先太傅公方  
建牙遼薊所從中伏戎而猝發譬則疾雷也卽先  
太傅公掩耳且不及而况他乎已而先太傅公一  
還兵部再掌吏部猶時時嚮人士齒及咨嗟不已  
故僕間嘗爲書託友人蔡白石陳謝云云載之刻  
集中公固可覆也僕於先太傅公蓋負不世之知  
者而頃者縉兒復及公收錄附之牋記語不云乎  
生不能報沒不敢忘僕衰且耄已無及矣異日兒  
曹或及厠公從吏末少狗國家此則愚父子奮報  
知己之區區而又不知天之所以慰桑間之餓者

何如也

復沂水宋大尹書

僕待罪河魏時不敢以簡將士習戰陣爲職而數共諸文學上下古今宴酣經史欣然樂也已而僕坐忤執政擊之來歸諸賢所各以其才翱翔仕路僕按省試與登科錄知名氏所傳非不抵掌欣躍而僕旣以罪廢嘗之伏蟄之蟲不復與諸賢相爲傾倒甚矣世路之嶮巇日月之奔駛而故人知己之思徒切夢寐也縉兒遣使南還忽得手書知君且抱琴爲令又適與兒曹所領之邑齒相錯僕雖

不及與君縮帶爲歡而兒獲附同官稍屬世講不勝欣慰兼金文綺之惠又胡爲乎來哉覽手書且亟稱僕旣不得以勲業奮昭代或當以區區文章詩歌之什與近時空同大復輩相頡頏嗟乎僕豈敢望哉然僕所自好處已稍稍與世之豪雋移書論列大較見之集中君倘不鄙或可取而覆也我國家弘治正德以來詩歌之什已彬彬乎戛金石奏宮商或可與唐大曆貞元相倡和矣獨其文章則僕竊謂當如孔子所云其辭文其旨遠必得六籍之深而始可與之升其堂而入其室也否則恐



不免如蘇長公所誚楊雲第以艱深之辭文淺近之說世之所競慕以爲摹左傳摹史記摹漢書縱極其工當亦優人者之貌孫叔敖焉耳而况其所摹者特句字之詰屈聲音之聱牙而已僕竊耻之世之士或與我者半薄且疑者半要之文章之在天地間久則公論自定非僕之所敢知亦非僕之所能與也君倘過縉兒官舍試出其書讀之不知君謂然否

與杜司諫爵齋書

僕嘗左官洛州而先公滄涯先生抑適以休沐還故里僕遂及附先公爲縮帶交當是時郡中縉紳大夫大較多趙魏慷慨悲歌之士金憐僕之襟期所嚮而先公尤深僕稍稍獲從簿書之暇發憤於六藝百家之書而忘其左遷之猥瑣焉甚矣於今夢思也縉兒釋褐令章丘又適明公領襄州郡間聞明公又推先公之愛而忘年而弟之又從而教誨之兒曹遽得引明公懸魚狎雉之遺而尺寸之上及信之郡二千石及藩臬諸使君而下之吏民不以罪仁人長者之賜也詩不云乎中心藏之何日忘之明公過南都領諫垣僕幾擬跨一驢謁謝

左右顧年已衰遲二豎爲祟犛犛待盡不敢出門  
戶間嘗爲七言近體欲塵記室而未能也世路方  
休而明公以海內譽望之賢出爲南司諫司諫者  
朝廷之耳目而南都則又鎬京之舊非特國家官  
寢肘腋百官之近也南通江漢捷百粵西帶汴宋  
北按淮而明公輩譬則天象之樞斗焉今且水災  
非常二百年來所無者吳越間以澤爲國而故所  
憑城市墟里而禾黍相望者今金一壑矣仰觀象  
緯又多訛言明公得無中夜攬帶之思乎茲特具  
書奉候外函家刻一部併舊詩一章伏惟覽教

與蔣西叟太守書

言別來又逾三載矣公抱道術多態經鳥備之訣  
而年彌高神彌王公猶能從丹房芝幢間歌詠自  
娛古人云左摩洪厓右拍松喬非公所自得於山  
之深而林之遠者乎曩所共公結駟而遊金轡而  
歡者凋落殆盡而纍纍僅存者惟我附公兩肘耳  
公每以翩翩霞矯自許其肯挈我而騎黃鵠履泰  
清否乎公家五湖之北僕臥五湖之南盈盈一水  
譬則女牛之隔河漢也客有錢生者自稱其大父  
行從公爲綰帶交今且裹糧而過敢於其鴻鴈之

翻附問左右僕雖衰且羸公倘能食我以松枝飲  
我以玉屑猶當附青鳥而從公杖履間也

與衢州道曹使君書

公及三衢來數從使車齒頰傳公繾綣之情甚矣  
故人知己之思也三衢者介宣歙吳越之間所稱  
龍游東陽義烏諸下邑蓋盜藪也中多豪猾爲之  
窟引而浙之右族大姓被其來往行劫者什而七  
八卽如僕不肖亦於今談虎而色戰者也此所以  
於公下車之初間爲奏記及之朞月間聞遠近稍  
稍戢矣無迺龔渤海趙京兆之遺而賣劍買牛賣  
刀買犢并及剝皮建鼓而斷頭藁街者乎久缺問  
候適丹徒故簿鄭君之子過山中特借鴻便稍布  
尺牘

又副言

僕令丹徒時有鄭簿者常山人以廉吏聞者也嘗  
督糧謝絕常例已而病沒無以爲殮吏民哀而哭  
之者不下數千人僕以其情聞之當路厚爲卹賻  
始得扶喪來歸以故其族姓邑子至今往來如通  
家且鄭以廉守官見稱於時然亦以廉廢家而三  
十年來益且窘矣今有孫名起宗爲衢州府吏頗

善書敢以其名聞之臺倘辱公憐其故嘗簿丹徒者之廉爲之恤其廬收其苗裔卽得從書記廁斯輿臺之末卽古人所以憫孫叔敖之後負薪行歌而爲之歔歔感慨也已公仁人長者也不勝佇望

與張明江太守書

僕無似辱先師文定公覽會場中所爲試卷輒首器之以爲國士會所條答策問中頗觸忌諱故次之稍後然非文定公本擬也已而廷試日文定公欲以策呈 御前又適爲忌者故匿試卷填三甲中卷始出而復溲文定公覽睹之不勝憤鬱僕之數竒孤文定公多矣今弟來得公手書且驚且喜聞曩所廷試卷文定公猶及收而藏之家中而僕於此不能不憫然自失而併欲於公處求之傳示子孫也僕位厯中大夫罷官來歸卒不能樹功名垂竹帛甚負師門而兒曹以下稍及掇一第出爲令頗竊民譽卽叔季輩抑及鴻次善文章茲固明江公之所爲我解頤而亦或文定公之所含笑於九原者也忝在通家故敢附聞別諭族子欲刻兩浙風雅併索篋中稿欲爲傳之然僕舊有吟稿十卷已列三稿刻中茲特附覽求教而他所未入

刻者別錄一二百首大較金山澤間幽臣羈客不得志而故爲寒泉螻蝻之音非所以擬之騷人墨子也伏惟我公痛爲剗削擇其稍可者而傳之否則重爲木灾也已皇恐皇恐

與張嵒峽司馬書

公之按節浙上浙之吏民所欲家戶祝而戶俎豆之者譬則晉羊祜於襄陽宋張詠於成都是已而僕所銜且戴者獨深何者僕罷官以來三十餘年于茲海內知己零落殆盡豈謂頃者地方鼎沸之患 聖天子且借國家之重臣儼然臨焉而公

又不遺故舊所相爲吐哺而拭拂之者久而彌篤不以厭勅若此薊遼以來公之奏凱之書旦暮上聞所當舉旗斬將而効首虜者不下數千馘矣卽傳記所稱漢之衛霍唐之李郭恐亦無相遠公向屬不肖紀令滑以後數事僕恨衰颯之年謏薄之識猶未能爲公次行事然要之一二年來公所爲朝廷統將帥靖疆圉寒氊表遠斥堠者益於往事功且百之公今入領大司馬非特一重鎮一邊徼而職方所籍薄海內外咸屬兵鈴矣久羈稱賀以文稿未上恐掌書記者簿責坐罪故惶恐到今茲

縉兒入朝當必以通家子弟過邸第故敢嚮風  
上候伏惟台亮

與鄭太守書

桐廬布衣而解青囊者曰俞汝彛故都御史俞莊  
襄公之族孫而先府君沒所嘗憑之以上葬者也  
然青囊術特屬客遊無他異能獨其言不妄發行  
不妄動事父母孝與朋友信頗有閭里俠節仗義  
者之槩予故重之而年四十無子間嘗出帷中侍  
女備巾櫛而其父號前江亦以篤行聞而鄉飲於  
其學宮者也獨臥一榻者累二十餘年予間候于  
其廬親見其父子相爲師友圖書四壁而蕭然若  
漢獨行也故益加敬之所於父子間前後投贈詩  
文及爲之題其墓而哭之死積若干什金附載故  
所刻中一一可覆也倘父母手而讀之卽可以了  
睹予兩人者之交矣乙酉年不幸汝彛病且沒其  
將屬續也從臥榻間爲書數百言遣侍兒俞湯永  
訣大略悲無兄弟所遺老母年八十而遺幼孤兆  
麟特八齡又其妻先亡而孤特育之故所遣侍女  
予不勝泫然泣輒以義諾其所請爲之移書與文  
而弔且哭之數年無間春秋時時遣使過其廬而

問其母與子然每痛汝彛雖亡無他兄弟捍衛門戶猶幸其生存也以故所畜養家奴俞招壽及其長子俞池次子俞湯最有恩蓋計其家之貲產不下三千金盡以委之池與父子如手足心膂然當必能移所世沐其衣食婚娶之恩而報之也豈謂其父俞招壽既老而長子池掌其家一旦背主占其家業所遺如囊中貲甚且匿其故所遺古書畫玩器又從而賣廢其田四十五畝不肖既不量力於汝彛之臨年而訣也已許之矣今豈敢食其言乎故復不自量力日夕深憂繼之以泣其族中雖係名閥然能仗義而爲之寢護其家撫其母與孤者絕少也其遺孤所聘婚雖係蘭谿章楓山族子然又道遠不能顧也况俞池既惡其妻趙暴悍特甚視老母弱子如几上肉而予所故遺侍女蓋備巾櫛者已十三年而與孤相爲命者也近亦被池夫妻奪其衣奩逐之來歸矣萬不得已與其族衆故友爲此上請父母俯憐不肖生前之交必不忍背其身後之諾俯按別狀特賜親提其近族俞汝在俞汝兆與其故交省祭吳大鳴併查弔汝彛存日文簿一一逐項稽考聞俞池橐中所積不下數

百金一則首爲勒令回贖節年賣廢之產二則籍其所匿古書畫及玩器之類三則姑聽伊弟俞湯代掌家事併留其父與母而衣食之以隨幼孤至於俞池所生四子併所娶二婦及其男女九口悉令歸宗其屬之俞湯也煩案查見存家業一一登記爲印信文簿三扇一留存府卷一給俞湯收掌一存遺孤兆麟或伊婚蘭谿章家以待麟壯而婚娶之後照數交還蓋借父母三日之勞則汝彝可保九原之託而不肖異日身沒亦可與汝彝相見于地下而無慙赧此則明府百世血食睦州者功案之一也臨風流涕無任瞻切

### 上撫臺滕公書

公按節臨鎮以來適湖中水災非常僕從丘壑中輟聞飛章上聞請蠲租請改折請停解請緩征甚且犯觸忌諱請罷內織而中外縉紳大夫無不人人拭目而頌公之勞來勛勩之業者春夏以來米價騰踊人情洶洶閭里惡少因而聚衆剗桑望屋而食甚且椎剽行亂白晝劫掠其去嘯聚草澤弄兵潢池者特朝夕間矣賴公震怒嚴甲令除首亂釋脅從又從而移易官署督責守巡威聲所被翁



然以定而嚮之所謂鼎沸之患解於抽薪河流之災寢於決堤獨我浙東西哉五湖之間所欲因而幸亂共爲響應者譬之颺散而煙消日出也頃者舊穀旣沒新穀旣升而遠邇之間稍稍輯寧矣東南州郡億萬生靈其所家謳吟而戶歌咏者較之昔人所誦富鄭公之救青州者無異也嘗聞傳曰施法于民則祀之能禦大災則祀之能捍大患則祀之然則公之異日內執樞筦外鎮國家史官之所書太常之所旌當裒然在望而我浙之所當尸祝我公俎豆我公者又豈敢忘哉僕不肖衰且耄矣然公之勛業所嚮愿效一言以告他日之采風者非敢如世之爲諛而已也不知公能諒之否

與龍渠陽郡丞書

衰齡怯暑避臥竹林間忽辱使者傳手書至開緘讀之不啻飲之以金莖之露而鑿之以玉壺之水令人神解久之僕間從先公宦遊來於今四十餘年而當時縮帶而嬉金駟而馳其所共風流文藻爛然眉睫與夢思間於公使星所嚮豈不願爲之執鞭哉顧遲暮之年踈懶成癖大較稍犯楊鐵崖先生之痼疾矣及覽公所云恤災賑窮施行次第

蓋古者名二千石之遺而天於旱乾後賜之霖雨  
不知郡中士大夫有能爲公如蘇長公之碑喜雨  
亭而詩歌之否分俸之賜愧不敢當謹以近刻玉  
芝山房稿一編又舉子業刻一編附上請教聊以  
見衰老中猶於山澤間沉酣淋漓若此令弟教授  
湖中謂之安定先生風範可也而僕又承推先公  
世講之末相知獨深惜也猶不聞中朝之推轂而  
絮然博士間也如何如何

復陳五嶽方伯書

中秋夜對月銜杯醉後搦管點竄六羨堂記數十  
字已而閱鉛山與新城李簿相繼移書過促業已  
復門下矣又二十餘日李簿之使再至蓋其家復  
於篋中獲公所刻陳氏家園記而併以手札投寄  
者也僕手而讀之竊疑公之園林於雲夢江山之  
勝互爲吞吐綽約處固屬無盡而公所於天地間  
目得之而爲色耳得之而爲聲心神得之而爲塊  
比無垠處公往往憑欄倚几嘯傲乎其間而世之  
善文章閒賦咏者金爲公鑱畫點次之矣僕平生  
覽古之善記佳山水惟柳子厚爲最雖奇崛如韓  
昌黎當讓一步已而移官南粵間過永柳二州探

其洞壑所誅茅而亭輦石而臺一切勝槩猶疑柳子厚筆力不到也公家園林星羅齒錯於沔水遠近間得無移僕所以唁柳子厚者而爲之太息其間也乎僕衰矣不知天肯假之以年其及躡屣公之園林再爲摹畫一二否別諭李中麓太常蓋僕釋褐時以文章交而最深者也兒縉之令章丘業已移書叮嚀之太常之沒已二十餘年而無子其故所貯圖書古器已散而乳犢守殘業者特其繼嗣而已僕生平亟故知而兒縉於其父之執友亦往往事亡如事存承諭及敢復不盡欲言

與黃葵陽學士書

公以文章侍從 明天子德業日以宏聲問日以鬯而海內縉紳先生無不人人望 天子之

卜相傳麻矣僕雖衰且耄嘗獲從公弁髦間頃者姪一桂幸出自門墻僕之私德蓋有倍於恒情者夫士子稍解屬文掇一第固其常耳特憐茲兒少最苦心嚮學壬午之役同縉兒應試已爲有司所首錄適經房兩相爭遂擯不與當是時先期縉與桂出場後兩以試稿從馬上疾馳以歸僕覽之且曰兩兒當金第也已而桂獨絀僕不敢以縉之第

爲喜而以桂之紉爲泣茲固姻族鄉黨所共憐僕  
區區之私而歛歔太息者今九月朔日又得桂及  
少兒貢所爲試卷讀之僕笑曰桂獨脫穎而出矣  
已而報至卒果所覘姻族鄉黨之過者或爲慰或  
爲賀而衆或見僕喜色獨倍曩時嗟乎僕豈獨非  
人情哉蓋憐桂之數年間頗類蘇季子刺股流血  
發憤大業今稍及進慰先伯氏於九原則其所私  
慶獨切耳然則公之恩豈僕生之所能報而沒之  
所敢忘哉茲特齋沐爲書申謝聞桂已留京年且  
四十一切督之閉門下帷茲則僕得隴望蜀者之  
情而惓惓於父師之側者也

與錢繼修吏部書

頃聞許敬菴京兆所爲揭辯李見羅事遂蒙外徙  
或多憐之又或從而罪之且謂其無當僕獨不然  
何者士君子立朝惟不欺其心以報國家耳見羅  
事在西南蠻徼去中國萬里僕不知其事之曲與  
直然在敬菴則生平所共道義而骨肉者之交彼  
之相信者旣深則於其所疵指而悲之者切故持  
痛發憤而不得不爲之一湔洗其本末耳不敢遽  
謂其言之當然其皎然不欺二字則上可以質天

地感鬼神篤金石而言者引而訕之且從而罪謫之僕固知敬菴之所自信而沒齒不悔者然聞中朝執法家亦欲薄見羅中丞之罪不知其能轉移聖心否

與杜靜臺工部書

公之宦遊所嚮於南陽則疑西漢循吏於荊州則疑古者山澤之官其所綱紀吏民法而不苛廉而不劇甚哉仁人君子之流風遺澤所至尸祝而俎豆之者僕雖衰且耄然於世之賢士未嘗不夢且思之若泉之注壑而不能已頃聞公告病歸已匝

歲矣而僕始則不之知知則復爲病魔所困而支離林壑不能出門戶故公之道德宴言雖或若降若登若俯若仰於眉睫之間而杳然神遊而心馳於今猶未之及也茲顛使奉候而別所爲近刻詩文一編併舉子業一編附上請教蓋不及登堂而膝席聊以二種呈之杖履前公或覽之當有憐僕丘壑所未盡之軀而猶可共爲韻折而色澤也外雲履一豸補一則以促公再爲入朝履星辰步日月而繡斧裁冠以出也

與鎮江太守范見復書

頃者貢兒北試下第南還比至京口而丹陽以下  
且坐畚鍤濬河道梗不通矣妄持賤名傳刺問舟  
臺下甚屬旅窮而無當者辱公喜且愕曰吾不意  
此叟之猶在也迺遽以所乘巡船護之來歸竊思  
僕於海內賢豪未嘗不颯颯然思附縮帶交顧衰  
耄以來譬之坏戶之蟲而公何以明德之賜殷勤  
至此豈以僕嘗令丹徒公露冕所嚮或聞僕抑嘗  
竊譽茲土邪僕去縣四十餘年而縣之父老且或  
知或不及知而公當不以此也豈嘗手僕覆瓿之  
語而賜之耶抑或他有所漑於心者而殆及爾邪  
而僕又自揣樗櫟之資恐無繇也北望江流恨不  
及起駕千里而稽顙郡庭茲於使者之返先此附  
書以謝

奉韓敬堂少宗伯書

聞公以先公之憂歸來乎闔閭城上僕以衰朽之  
年不能躬爲匍匐頃者醫家某過草堂稍稍語及  
公之病魔頗與僕壯時略相似已而得解則所籍  
藥餌者什之二三而所於友人指授處稍稍得力  
殆什之七八也敢附以起居僕少習舉子業頗自  
刻勵衣不鮮帶榻不設枕者四三年又好湛深之

思於六籍百氏書及古之文章家之旨所當印心處往往中夜起而露坐甚且遺矢猶於廁中閉目冥思獨哦獨語客間過之每對面不之見客前呼始愕然起以故閭里賓朋數謂予癖而癡矣此年二十二三時事也已而第進士後先父母相繼喪哭聲晝夜不絕者累數月骨立不支分且必死每對花發輒嗚咽不自己且曰吾安得見其碩果也已而舉一兒頗聰穎輒又嗚咽不自己且曰吾安得及是兒之長且成立也已補令丹徒且欲毀檄自免者久之友人唐荆川過山中笑曰此予少時

所患君殆由文章爲之崇重以廬喪來哭泣太過致損心神耳聞聖人無心病君第過丹徒吾當時時過縣共君語君於是時病不瘳解綬未晚也僕於是迤邐就官每出堂視事輒憂或遽僵也每過南京謁上官甚且欲携木以行雖不及携而心之悸不已也至於每夜寢不交睫惟聽巡警者提鈴報更而已鐘鳴則攝衣以起荆川過之奮而言曰吾聞蒙莊云以瓦鑄者巧以金鑄者拙君得無自蔽而因以自斃乎僕聞其言爽然漸以解病亦漸以去而醫者亦時時投補心之劑又年餘始及故

吾時年三十五於古人所謂咄咄書空猶時有之  
四十罷官後則神日王而六十七來彊飯踰壯  
時矣公得無於僕似之乎公達人也超曠非常豈  
與僕樸遯齷齪比或其少時發憤典籍與歷先大  
夫之變其所由摧喪憂勞或相近耳藥餌固不可  
謝要之几榻間非蒙莊言卽佛氏書則其所助當  
或倍蓰蓋有勝於長桑華陀者已

與張澄齋憲副書

僕無似語所謂樗櫟蕭蓼不足比數者公之按節  
浙西時獨辱公開襟與之又從而折節以下之漢

暴勝之之於雋不疑不過也然僕間讀古傳記以  
公之材略及其風猷所嚮固當外之擁節旄鎮邊  
徼內之持國秉入政府而抑何以中道解組特繇  
藩臬歸來乎林壑泉石之間僕衰且耄嘗謂公家  
太湖之北僕家太湖之南盈盈一水幾擬鼓柁乘  
流而過從公朝且夕焉共爲嘯歌賦詠於薜蘿之  
叢煙霧之窟顧荏苒齟齬以至於今猶忽忽焉未  
之能也得無爲呂安所咲已乎秋之深決當載鶴  
從公錫惠兩峰之間適有友人周生者囊古書名  
畫求謁門下敢附尺牘以申宿約而家刻二稿附



上求教蓋欲公知且憐僕所自好而倘獲公之竄  
抹鐫示其間亦庶不孤生平之愛也

又副言

邑有友人周生某者少孤而力學其所當救郡劉  
清惠公南坦叅政陳公棟塘司馬蔡公白石輩所  
贈詩歌文章之什可見也其解母之囊裝也近于  
金然不治產獨好古鼎彝及法書名畫而於畫事  
尤甚問睹吳下公卿家所散唐宋來趙伯駒米南  
宮及范寬王大癡諸舊縑所遺輒傾母氏橐貯以  
求之故其家無半畝之宮往往借廬以貯圖書予

數過之家特四壁立而所共賓朋徜徉其間者香  
一炷茗一甌則出所貯圖書相品畫而已甚矣其  
癖且迂也數年來歲既侵米價日翔貴而午炊或  
不繼故不得不移故所貯以鬻之士大夫家而世  
之士大夫未必知且好卽知且好抑未必其力之  
給否也頃者范司成特爲移書孫太史太史固稱  
知且好者而其力之給與否吾亦不知其何如也  
語曰青萍長價於薛卞之門公得無憐之而傾橐  
中裝以資且給之否乎公卽力或不給貴郡固多  
素封倘蒙不惜齒牙魚目燕石皆爲隋珠和璧矣

惟留神焉

*[Faint bleed-through text from the reverse side of the page, including characters like 惟, 留, 神, 焉, 大, 夫, 等]*

一 惟留神焉

一 惟留神焉

一 惟留神焉

*[Faint bleed-through text from the reverse side]*

*[Faint bleed-through text from the reverse side]*



